

EXERCITATIO THEOLOGICA

ad

Johann. IX, 1. 2. 3.

De

CAUSA CALAMITA-
TIS IN HOMINE A NA-
TIVITATE CÆCO,

Quam,

SUB PRÆSIDIO

L. THOMÆ ITTIGII,

Theolog. P. P. & Archi-Diacon.

ad D. Nicolai,

DN. PATRONI AC PRÆCEPTORIS SUI
ÆTATEM COLENDI,

GOTTFRIED ROSENTHAL,

Gothanus,

ad d. XXII. Dec. A. MDC XCVIII.

in

AUDITORIO PAULINO,

Horis consuetis

placida disquisitione ventilandam
proponit.

L I P S I Æ,

Literis CHRIST. GOEZII.

*SERENISSIMO PRINCIPI
AC DOMINO,*

**DOMINO
FRIDERICO,**
DUCI SAXONIÆ, JULIACI, CLI-
VIÆ ET MONTIUM, NEC NON
ANGARIÆ ET WESTPHALIÆ,
LANDGRAVIO THURINGiÆ,
MARCHIONI MISNIÆ, PRINCI-
PI COMITI HENNEBERGÆ, CO-
MITI MARCÆ ET RAVENS-
BERGÆ, DOMINO RA-
VENSTEINII ET
TONNÆ,

*PRINCIPI AC DOMINO SUO
CLEMENTISSIMO,*

58700(21)

Exercitium hocce academicum gratum ad testificandum
animum pro collatis clementissime beneficiis hu-
millima devotione offert, seque porro suaque studia
commendat



RESPONDENS.



I. N. J.

S. I.



Ria priora ex nono Evangelii Johannei capite commata, quibus Christi responsum ad quaestionem discipulorum de causa calamitatis in homine a nativitate caco continetur, breviter expensuri, antequam rem ipsam aggrediamur, eum qui cæci oculos aperuit supplices veneramur, ut in nobis a nativitate spiritualiter cæcis ignorantiae tenebras Spiritus sui gratia dispellat, & lumine hoc cælitus demisso mentium nostrarum oculos ad cognoscenda sapientiae, bonitatis & potentiae suae opera serenet.

S. II.

Verba S. Evangelistæ meditationi nostræ destinata ita se habent :

JOH. IX.

1. Καὶ παράγων, εἶδεν ἄνθρωπον τυφλὸν ἐκ γενετῆς.
2. Καὶ ἠρώτησαν αὐτὸν οἱ μαθηταὶ αὐτοῦ, λέγοντες·
Ραββὶ, τίς ἥμαρτεν, οὗτος, ἢ οἱ γονεῖς αὐτοῦ· ἵνα
τυφλὸς γεννηθῇ;
3. Ἀπεκρίθη ὁ Ἰησοῦς, οὔτε οὗτος ἥμαρτεν, οὔτε οἱ
γονεῖς αὐτοῦ· ἀλλ' ἵνα φανερωθῇ τὰ ἔργα τοῦ
Θεοῦ ἐν αὐτῷ.

quæ Sebastianus Schmidius ita transtulit:

1. *At prateriens vidit hominem cæcum a nativitate.*

2. *Tum interrogarunt ipsum discipuli ipsius, dicentes: Rabbi, quis peccavit? hicne, an parentes illius, ut cæcus natus fuerit?*

3. *Respondit JESUS: neque hic peccavit, neque parentes illius; sed ut manifesta fierent opera DEI in illo.*

§. III.

Duo hic imprimis consideranda nobis occurrunt, nempe quaestio Discipulorum, & Magistri responsum. Quaestionis, ut inde ordiamur, duplex occasio recensetur, una remotior, altera propinquior. Remotio-rem indicat Johannes his verbis: καὶ παρὰ γὰρ. In quibus particula copulativa καὶ initium noni capitis cum fine præcedentis octavi indivul-fo nexu conjungere videtur. Octavum enim caput his vocibus clauditur: καὶ παρὴν γένεσιν, & prateriit ita. Quis autem non videat hanc o-ctavi capitis clausulam cum principio noni capitis arctissime cohærere, quippe quod tale est: καὶ παρὰ γὰρ, & prateriens? unde haud impro-abiliter colligitur, quod hic Christi transitus, qui Discipulis de homine cæco quaerendi occasionem dedit, prope templum & illo ipso tempore fa-ctus fuerit, quo Christus, ut Judæorum lapides evaderet, per medios hostes templo invisibiliter egressus fuerat.

§. IV.

Objici quidem posset, quod Christo cum templo egrederetur, Disci-pulos affuisse non legamus, quos tamen comites habuit, cum viam illam, in qua homo a nativitate cæcus sedit, prætergressus est, quo argumento Cornelium Jansenium Gandavensem Episcopum in commentario ad con-cordiam evangelicam a) usum deprehendimus. Verum Maldonatus b) respondet, fieri potuisse, ut, cum Christus visibiliter templo exiisset, Discipuli quoq; Magistrum suum oculis ereptum quaesituri templo egressi fuerint, statimque invento quem quaesiverant denuo se adjunxerint. Quo-circa magis se nobis approbat alterius Cornelii Jansenii Iprensis Episcopi sententia, qui in tetrateucho suo c) Christum templo egressum paulo post

post eadem die cæcum sanasse judicat, ut divinitatem suam à Judæis impugnata hoc miraculo demonstraret.

a) c. 278. b) comment. in 4. Evang. p. 745. c) p. 491.

§ V.

Objiciunt alii, probabile non videri, quod Christus, cum Judæorum rabiem vix effugisset, illo ipso tempore ad miraculum in cæco patrandum se accingere, & hostium animis adhuc magis exacerbandis ansam dare voluerit. At Asterius Amasenus in homilia de homine a nativitate cæco, quam Franc. Combessius in novo auctario bibliothecæ Patrum græco-latinae d) ex Sirmondi autographo per Seguierianum codicem correcto luce publica donavit, non dubitat, quin Christus, cum spirituales hostium suorum cæcitatem verbis sanare non potuisset, eandem per editum in cæco miraculum curare tentaverit, sapientem medicum imitatus, qui morbo ad primum experimentum non cedente aliud remediū expugnando morbo aptum adhibere solet. Alias rationes, cur Christus, pro injuriis hostium beneficia rependere solitus, statim post egressum suum e templo cæci sanationem aggressus fuerit, Chrysostomus e) adducit, quibus recensendis jam immorari nolumus.

d) T. I. p. 106, e) homil. 55. in Job.

§ VI.

Sed quid Wolzogenio respondebimus, qui, etsi utramque illam, quam brevi solutione addita attulimus objectionem, infirmam esse fateatur, nec dissimulet, si quis finem octavi capitis in evangelio Johannis cum initio noni conferat, duo illa capita velut uncinulis vel ansulis quibusdam ita inter se confibulata deprehendi, ut Christi cum Judæis disputationem in octavo capite descriptam illico curatio hominis a nativitate cæci, de qua in nono capite agitur, excepisse videatur: irrefragabiliter tamen evinci posse putat; quod inter præteritionem Christi, quæ in fine octavi capitis commemoratur, & inter illam, quæ in limine noni capitis recensetur, saltem integri septidui spatium intercesserit? f) Ut ita sentiret, hac ratione se adductum scribit, quod curatio cæci die sabbathi facta fuerit, ut ex vers. 14. patet, Christi autem cum Judæis disputatio postridie post ultimum diem festi tabernaculorum contigerit, ut ex cap. VII, 37. & VIII, 2. inter se collatis demonstrari potest. Breviter ad hæc dicimus, etsi omnino cæcum hunc, de quo agimus, die Sabbathi, quo alias Judæis sputum super oculos ponere nefas esse ex eorum scriptis Buxtorfius in lexico talmud. (p. 2132.)

observavit, a Christo sputum pulvere permixtum super ejus oculos ponente sanatum fuisse constet, neque negari possit, illam Christi disputationem cum Judæis, quæ Johannis octavo capite legitur, die ultimum festi tabernaculorum proxime secuto institutam fuisse, nondum tamen Wolzogenium argumentum suum pro irrefragabili venditare posse, nisi simul probaverit, diem ultimum *συνωπνύας*, quem Johannes maxime solennem fuisse indicat, illo anno, quo hæc acta sunt, in sabbathi diem incidisse. Quod cum non probaverit, neque probari possit, opus haud erit, ut disputationem Christi cum Judæis postridie sabbathi contigisse, & ab ea usque ad sanationem cæci, si proximo sabbatho ea facta est, saltem integrum septiduum intercessisse statuamus.

f) Comment. in Johann. p. 882.

§. VII.

Majorem scrupulum sententiæ nostræ injicit harmoniæ Chemnitianæ continuator Polycarp. Lyserus, qui disputationem Christi cum Judæis octavo Johannis capite descriptam a sanatione cæci, quæ in sequenti capite, narratur, interjectis pluribus aliis historiæ evangelicæ partibus divellit. Interponit enim historiam Christi post 70. Discipulorum reditum intime gaudentis, Apostolos suos beatos prædicantis, Legisperitum informantis, & parabolam de Samaritano proponentis, ad Mariam & Martham divergentis, Discipulos orandi modum & formulam docentis, Dæmonium mutum ejicientis, apud Phariseum quendam convivantis, de hypocrisi cavenda aliisque rebus proluxa concione differentis, occasione tragicorum quorundam casuum auditores suos ad pœnitentiam exhortantis, mulierem diuturno morbo laborantem in sabbatho sanantis, & hoc factum adversus Archisynagogum defendentis, & denique versus Hierosolymam proficiscentis. Et in hoc ipso itinere versus Hierosolymam ad celebranda ibi encænia suscepto cæcum in via sedentem se Christi oculis objecisse Lyserus g) arbitratur, statuens, Christum non recta urbem ingressum, sed ad portas delatum eam quasi circuivisse, quem circuitum voce *παράγειν* denotari censet. Veruntamen iste scrupulus haud difficulter eximi poterit, si omnia ista historiæ evangelicæ capita, quæ Lyserus inter octavum & nonum Johannis caput interponit, sanationi hominis a nativitate cæci postponamus, quem ordinem Johannes Richardsonus Ardachadensis Episcopus in harmonia Evangelistarum, quæ Usserii annalibus b) subjecta est, haud incommode tenuit. Quin etiam omnes, qui ante Lyserum har-

moniam

moniam evangelicam concinnarunt, ut ipse in prolegomenis ad caput 104. fatetur, nonum Johannis caput cum octavo immediate connexuerunt, & quamvis rationes, quas pro sua opinione adducit, non plane contemnendæ videantur, tales tamen non sunt, ut communem aliorum sententiam relinquere cogamur. Quamobrem cum nihil urgeat, ut postrema octavi & prima noni capitis verba divellamus, utrobique unum eundemque transitum describi minime dubitamus. Quæ sententia etiam Wilhelmo Lyfero in disputationibus exegeticis ad Johannem i) placuit, nec non Erasmo Schmidio, qui ad finem octavi capitis hæc annotavit: *e templo egressus præteriit domos quasdam urbis templo vicinas, dumque eas præteriit, vidit cæcum, de quo capite sequenti. Ita Dominus Jesus etiam in medio aestu persecutionum non desinit benefacere k).*

g) c. 113. p. 1215. h) p. 621. i) disp. ad c. 9. thes. 2. k) declarat. Nov. Test. pag. 698.

§. VIII.

Utitur Evangelista hunc transitum describens verbo *παράγειν*, quod hoc loco idem est ac prætergredi, in qua significatione apud Evangelistas passim usurpatur, ut de Simone Cyrenæo Jesum sub bajulato crucis onere fatiscentem prætereunte Marc. XV, 21. & plerumque de Jesu homines aut obvia loca prætergresso Matth. IX, 9 27. XX, 30. & Marc. II, 14. Et hic ipse quoque est, quem Johannes in nostro loco ut *παράγων* inducit. Id enim & ex præcedentibus & ex consequentibus elucescit. Quin etiam in quibusdam codicibus expressum JESU nomen additur, & Evangelistæ verba sic leguntur: *καὶ παράγων Ἰησὺς*, ut ex variantibus lectionibus Oxoniensi novi Testamenti editioni additis apparet. Hæc de remotiori quæstionis Discipulorum occasione seu de Christi transitu dicta sufficiant.

§. IX.

Propinquior occasio, quæ Discipulos ad quæstionem Magistro suo proponendam impulit, fuit aspectus hominis a nativitate cæci, quem Evangelista his verbis exprimit: *εἶδεν ἄνθρωπον τυφλὸν ἐκ γενετῆς*, vidit hominem a nativitate cæcum. Nomen hujus hominis Evangelista tacuit. At non tacuit Petrus de Natalibus Episcopus Equilinus in catalogo Sanctorum l), cui si fides adhibenda foret, dicendum esset, homini huic cæco nomen fuisse Cedonio vel Sidonio. Sed pari temeritate Natalis aliq; hujus furfuris Scriptores hunc cæcum Cedonii nomine baptizant, qua

Car-

Cardinalis Vicarius vel Episcopus Capellæ Pontificiæ præfectus Sanctis incognitis nomina indere solet, qui inde Sancti baptizati appellari solent. ut Eusebius Romanus, sub quo nomine doctissimum Monachum Joh. Mabillonium latere accepimus, in epistola de cultu Sanctorum ignotorum ad Theophilum Gallum hoc anno 1698. Parisiis edita testatur. Fueritne hic Cedonius ex numero 70. Christi Discipulorum, Equilinus Episcopus in ambiguo relinquit, illud tamen planum & certum esse tradit, quod Christi Discipulus fuerit, & post ascensionem Christi baptizatus Maximino specialiter adhæserit, & simul cum Maximino, nec non Lazaro ejusque sororibus naviculæ impositus & Judææ finibus expulsus fuerit. Cum autem post naviculæ illius ad Provinciæ littora appulsum Lazarus Massiliensium, & Maximinus Aquensium Antistes ordinatus fuisset, Cedonius hic ex ejusdem Petri Natalis relatione in Maximini ministerio tanquam ejus Coadjutor mansit, donec in pace obdormiret, & mortuus quoque Maximini lateri eidem sepulchro illatus adjungeretur.

l) lib. 5. c. 102.

§. X.

Apud Salmeronem m) Celidonius, forte ad *χελιδώνα* seu hirundinem, quæ Tobiam excæcasse perhibetur, respectu habito; a Fratribus Sammarthanis in Gallia christiana n) ex proprio Aquensium hagiologio Celonius appellatur. Verum ista de Cedonio relatio ad volantes illas quisquilias pertinet, quas Petrum de Natalibus in suo catalogo collegisse Launojus in tractatu de Lazari & sororum in Provinciam appulso o) haud immerito judicat. Simul autem cum volantibus his quisquiliis diffidam judicamus Salmeronis conjecturam, qui historiam hujus cæci a reliquis Evangelistis ideo prætermittam suspicatur, quod illorum ætate Celidonius adhuc viveret, & hoc Celidonii nomen ubivis cognitum in omnium ore versaretur, Johannem vero, qui omnium ultimus scripsit *ἀξιωματώμενον* hoc Christi miraculum, cum jam Celidonio non amplius superstiti paulatim ex hominum memoria deleri coepisset, literis consignare voluisse; quasi vero reliqui Evangelistæ res suo tempore gestas & sua ætate pluribus notas negligere & silentio involvere voluissent, aut Johanni tantum res ex hominum memoria pene deletas tradere propositum fuisset.

m) Tom. VI. tract. 39. p. 256. n) Tom. I. p. 2. o) p. 49.

§. XI.

Qualecunque autem hominis hujus nomen fuerit, statum ejus miserrimum

num fuisse nemo dubitabit, quisquis, quantam malorum congeriem cæcitas secum afferat, expendet. Sanè Gregorius Nazianzenus illam *p)* τὸ βαρύντατον τῶν κακῶν seu omnium malorum gravissimum & acerbissimum appellat, & Basilii Seleuciensis *q)* cæcos mortuis æquiparat cum ait: ὁφθαλμῶν ἐξήσπισ ἀβίωτον βίον ἐργάζεται, i. e. *oculorum privatio vitam reddit minime vitalem*, quo loco & plura ad delineandam cæcitatis miseriam adducit.

p) Orat. 16. p. 249. *q)* Orat. 36. p. 303.

§. XII.

Augebat hominis miseriam, quod ἐκ γενετῆς a nativitate cæcus esset. Alii homines cum ex uteri tenebris eluctantur, jucunda lucis usura perfruntur, ac si aliquo casu cæci fiant, saltem recordari possunt, qualis in hoc elegantissimo mundi opificio sit rerum facies. At cæcus hic in perpetuis tenebris hætenus versatus pulcherrimum solis lumen nunquam viderat. Cæcus ille sexagenarius, qui duodevicennis in cæcitatis calamitatem inciderat, rogatus, quot annos natus esset, respondit, esse sibi ætatis annos duodeviginti, & unam noctem, significans se, ex quo diei & noctis vicissitudinem oculorum usu non amplius distinguere poterat, unam tantum sed diurnam & per aliquot annorum decadas continuatam noctem transegisse *r)*. Noster autem cæcus, si de annis ætatis suæ rogatus a quopiam fuisset, unam tantum noctem se vixisse, ab utero quippe cæcus, respondere potuisset. Digna autem fuit hæc circumstantia, quam Evangelista annotaret, cum ad illustrandum Christi miraculum faciat. Nam, ut ipse cæcus v. 32. profitetur, ἐκ τῆς αἰῶνος ἔκ ἡμέρας, ὅτι ἤνοιξε τις ὁφθαλμὸς τοῦ φλόγ γεγεννημένῳ a seculo non auditum est, quod aliquis cæco, qui talis natus est, oculos aperuerit. Et Aristoteles quoq; asserit *s)* nullum τοῦ φλόγ γεγεννημένον ἀναβλέψαι. Et quamvis etiam historia ecclesiastica cæcos quosdam suppeditet, qui a nativitate cæci visu donati sunt, sicut Odiliam ἐκ γενετῆς cæcam in baptismo visum recepisse ex Hildulphi Episcopi Trevirensis vita Browerus *t)* retulit, divina tamen virtute non humanis viribus illam restitutionem factam esse, si omnino facta est, extra dubitationis aleam positum videtur. Unde & Ambrosius in epistola ad Bellicium ejusmodi cæcorum curationem non artis sed potestatis esse pronunciat *u)*.

r) conf. Raynaud. in triade fortium David. T. IX. Oper. p. 259. *s)* vid. Caubaub. in bibl. crit. p. 1708. *t)* annal. Trevir. lib. 7. ad A. C. 768. p. 377.

u) epist. 75. vel. juxta nov. edit. 80.

§. XIII

Non solum autem visu, sed etiam organo visus hunc cæcum, quem Christus aspectu suo dignatus est, orbatum fuisse antiquus Johannis Metaphrastes Nonnus asseruit. His enim verbis, quæ pæne horrorem legentibus incutiunt, cæcum hunc delineat:

Ὅστις ἦν περίφοιτος ἀφωτίστοιο προσώπῳ
 Συμφερῆν, ἀμέριστον ἔχων ἀχάρακτον ὀπωπῆν
 Ἦν φύσις ἐκ ἐτύπωσε· λιποβλεφάροιο δὲ κύκλῳ
 Οἰθαλέον ξένον ὄμμα γενεθλιάς εἶχεν ὁμίχλῃ,
 καὶ βρέφει ἔπολε τοῖον ἀνόμμου ἡλικὶ κόσμῳ
 Ἦνίοχ· βιότοιο φύλοσπόρε· ἦγαγεν αἰών.

Talem igitur cæcum a Christo visum Nonnus asserit, qui, ut Nansius x) verba ejus interpretatur erat circumvagus, habens confertum, indivisum, non signatum faciei lucis expertis visum, quem natura non expresserat: sed natalitia caligo habebat tumidum peregrinum oculum circuli palpebra carentis, & parens seu prolificum ævum vitæ moderator nunquam adduxerat coætaneo mundo talem infantem oculis carentem, seu ut Bollingerus Nonni mentem brevioribus verbis clarius expressit: y)

cæca qui fronte gerebat
 Densum, informe, ingens tuber, cui nulla figura,
 Cæcigenum talem non unquam secula tulerunt.

x) p. 133. y) in Nonni paraph. carm. lat. redd. p. 46.

§. XIV.

Favent huic sententiæ ex Patribus, quotquot Christum ex sputo & pulvere oculos hujus hominis formasse dicunt. Cyprianus enim in tractatu de bono patientiæ z) insultantium sputamina illum patienter accepisse scribit, qui sputo suo cæci oculos paulo ante formaverat. Et Basilii Seleuciensis, ἀλλ', inquit, ὁμμάτων ἐκ φύσεως ἐρημῶ καὶ μετὰ τὸ τῆς γαστρὸς δεσμολήριον τὸν & πάθος ἐκ ἀπεδύετο ζόφον, καὶ νύξ μακρὰ τῇ ζωῇ συνοδύεσσα, ἕως αὐτῷ φῶς ἀληθινὸν ὑπαπαντήσας Χριστὸς ἀπέδωκεν τὴν ἡμέραν τὰ τῷ φωτὸς ὄργανα χαρισάμεν· ἔξω τῆς γαστρὸς πλασθεγῆσας, ἅπερ ἔνδον παρῆλπεν a) h. e. alius oculis a natum captus post uteri carcerem caliginem, qua afficiebatur, non exuebat, & longa nox vitæ ejus comes erat, donec ipsi Christus verum lumen occurrens diem redderet, lucis organis extra uterum fabricatis, qua intra

intra uterum omiserat. Addit Basilius, caelestem hunc Medicum *τέχνην Θεατρικὴν* artem, qua pollebat oculos formandi, hac vice quasi in publico theatro hominum oculis exposuisse, ut, dum cæcum oculorum lumine donaret, simul per hoc miraculum spirituales tenebras, quibus Judæorum animi excæcati erant, dissiparet.

2) p. 213. edit. Angl. a) homil. de duobus cæcis p. 302.

§. XV.

Et jucunda quidem est meditatio, si formationem oculorum ex luto cum creatione primi hominis ex pulvere conferamus, & utrobique unum eundemque opificem agnoscamus, qua collatione Patres delectari ex Irenæi b) aliorumque monumentis constat. Neque impossibile fuisset Filio Dei, si cæcus hic juxta Nonnum *ἀνόμωτος* c) fuisset, hunc naturæ defectum formatis in ejus facie oculis supplere, quemadmodum nonnulli existimant, quod Christus mancos ita sanaverit, ut pro detruncatis manibus alias ipsis omnipotenti sua virtute restituerit, cum Matthæi XV, 31. *καὶ ἄλλους* sanasse dicatur, *καὶ ἄλλοι* autem apud eundem Evangelistam appellentur, quibus manus amputatæ sunt Matth. XVIII, 8. Veruntamen cæcum hunc oculis caruisse, ex Evangelistæ verbis probari non potest, ex quibus potius contrarium apparet, quoties Christus hominis hujus oculos aperuisse dicitur v. 10. 14. 17. 21. 26. 30. 32. nec non quando Christus lutum hujus hominis oculis imposuisse memoratur, quod dubio procul postea, cum Christi jussu in piscina Siloam faciem suam lavit, aqua iterum abstersum fuit v. 6. & 7. Unde patet, quod Patres illi, qui novos huic cæco oculos ex sputo pulveri immixto formatos tradiderunt, nonnihil cæcutiverint, & magna illa lumina deliquium hic aliquod passa fuerint, quod etiam a Bartholino in tract. de morbis biblicis c), Beverovicio in epistola ad Schurmanniam d), & Schurmannia in responso ad Beverovicium e) observatum est.

b) lib. 5. adv. hæres. c. 15. c) sec. 20. p. 95. d) D.D. Vir. epist. & respons. p. 4.

e) ibid. pag. 8.

§. XVI.

Nobis ergo narratio Evangelistæ sufficit referentis, quod Christus præteriens hominem a nativitate cæcum viderit. In quibusdam exemplaribus additur, quod Christus hunc hominem *καθήμενον* seu sedentem viderit, ut Conzenius ad hunc locum annotavit. Videtur autem hæc vox ex v. 8. transumpta, ubi refertur, vicinos, & qui hominem hunc noverant,

quod cæcus antea fuisset, cum lucem ejus oculis donatam agnoscerent, admirabundos invicem dixisse: ἔχ' ἑτός ἐστιν ὁ καθήμενος καὶ προσαιτῶν; *nonne hic est, qui sedebat & mendicabat?* Sic ergo in cæco apparuit, nullam calamitatem solam esse, cum cæcus hic etiam cum paupertate conflictatus fuerit, & stipis colligendæ causa viam aliquam publicam obsederit.

§. XVII.

Quid vero Christus? vidit cæcum, non ea scilicet ratione, qua quæ contemnimus & cura nostra non dignamur obiter videmus; sed ita ut paululum subsistens intentos in eum oculos figeret. Et alibi quidem cæcos, cum Christum prætereuntem audirent, precibus suis eum implorasse legimus, ut misericordiæ suæ oculos in miseros flecteret *f*). At in hunc a nativitate cæcum Christus sponte & corporis & commiserantis animi oculos coniecit, cum nec ipse magnum hunc Prophetam prætereuntem videre posset, nec eum præterire ab aliis audiret. Nam quod Aretius *g*) cæcum hunc Domini auxilium invocasse scribit, cum Evangelista id tacuerit, non probamus. Forte tamen mendicantium more quosvis prætereuntes inclamantium a Jesu & Discipulis munusculum petiit, nescius, cum in prætereuntium numero versari, a quo munus quovis auro carius impetrare posset. Christus vero conversis in cæcum oculis occasionem quæstioni Discipulorum de causa hujus calamitatis præbuit, eosque, ut Isidorus Pelusiota in epistola ad quendam sibi cognominem Diaconum *b*) scribit, ad interrogandum tantum non provocavit.

f) Matth. XX, 30. 31. Luc. XVIII, 36. seq. *g*) in Johann. pag. 231. *b*) lib. II. epist. 272.

§. XVIII.

Nam a Discipulis suis interrogatum Christum fuisse Johannes clare dicit. Unde memoria lapsus est Ambrosius, cum in epistola superius allegata ad Bellicium scripsit: *quam stolidi autem Judæi, qui interrogant: hic peccavit, an parentes ejus? debilitatem corporum referentes ad merita delictorum.* Quem Ambrosii errorem Romana editio corrigere voluit, dum verba S. Præsulis ita exprimit: *quam stolide autem Discipuli interrogant!* &c. Verum ista lectio aliis Ambrosii editionibus & manuscriptis codicibus adversatur. Scilicet Ambrosius, cum quæstionem hanc stolidam judicaret, eam a Judæis potius quam a Discipulis Domino pro-

posi-

positam præsumsit. Unde Dallæus in tractatu de usu Patrum *i)* varios Patrum lapsus referens etiam hunc Ambrosii errorem annotavit.

i) lib. 2. cap. 3. pag. 247.

§. XIX.

Ipsam interrogationis actum Johannes voce *ῥωτήσαν* describit. Quod verbum non minus ambiguum est quam latinum *rogare*, quod & de interrogantibus & de petentibus usurpari solet. Hoc tamen loco non petendi significationem obtinet, quæ Matth. XV, 23. Marc. VII, 26. Luc. IV, 38. Act. III, 3. 1. Thess. IV, 1. & in pluribus aliis N.T. locis, & vel apud solum Johannem ultra decies occurrit: sed interrogandi, quæ significatio & ipsa apud Johannem & cæteros sacros Scriptores haud raro reperitur. Si Chrysostomum audiamus, dicendum erit, Discipulos *ἐρωτῶντας ἀλλ' ἀπορῶντας* non interrogantes sed dubitantes verba sua protulisse, quale locutionis genus esse scribit, si quis puerum morbo affectum intuitus diceret, dubitans magis quam interrogans: quid puellus hic commisit? Verum cum Evangelista aperte dicat, quod Discipuli Christum interrogaverint, ipsi potius quam rhetoricanti Chrysostomo adhæremus, etsi illam interrogationem *ἀπορῶντων* seu dubitantium fuisse haud inficiemur.

§. XX.

Is quem Discipuli interrogant, JESUS est. Nec quenquam in re perplexa melius consulere potuissent, quam qui κατ' ἐξοχήν Doctoris nomen merebatur. Eum vero titulo Rabbi compellabant, de qua voce apud Caninium *k)*, Cartwrightum *l)*, Drusium *m)*, Buxtorfium *n)*, Tarnovium *o)* & alios plura videri poterunt. Nobis nunc hoc tantum notare sufficit, quod hæc vox idem significet quod *Διδάσκαλος* seu Magister, ut ipse Johannes nomen hoc Joh. I, 38. interpretatur. Et quamvis etiam Johannem Baptistam a Discipulis ejus hoc titulo compellatum legamus Joh. III, 26. quem Phariseos etiam affectasse Christus indicat Matth. XXII, 7. peculiari tamen ratione Christo convenit, quem sæpius hoc nomine salutatum Evangelistæ tradunt a Judæis Joh. VI, 25. a Nicodemo Joh. III, 2. a Nathanaele Joh. I, 40. a duobus Johannis auditoribus Joh. I, 38. ab Apostolis Joh. IV, 31. Joh. XI, 8. a Petro Marc. IX, 5. XI, 21. nec non a Judâ, qui tamen apostata jam factus eundem hostibus prodidit, quem ore tenus Magistri elogio honoravit Marc. XIV, 45.

k) Disquis. ad loca N.T. c. 6. *l)* mellif. hebr. lib 5. c. 11. *m)* de vocib. Hebr. N.T. comm. prior. p. 138. & post. c. 20. p. 212. *n)* de abbreviat. p. 148. *o)* ad Johann. I, p. 172.

§. XXI.

Supereſt in quaſtione Diſcipulorum conſiderandum quaſtionis argumentum his verbis comprehenſum: *τίς ἥμαρτεν, ἔστος ἢ οἱ γονεῖς αὐτοῦ ἢ αὐτὸς τυφλὸς γεννηθῆναι*; *quis peccavit, hiccine an parentes ejus, ut cæcus nasceretur?* Elucelcit autem ex his Diſcipulorum verbis, cæcitatem hujus hominis adeo notoriam fuiſſe, ut nec diſcipulos latuerit, quod a nativitate oculis captus eſſet. Refert Gregorius Turonenſis *p)*, hominem Arianum ab Epifcopo ſuo Cirola quinquaginta aureis conductum cæcitatem ſimulaffe, & in via publica Cirolam prætereuntem, ut manum oculis imponeret, & lucem illis redderet inclamaſſe, ſed fraudem illam & Dei irriſionem male ceſſiſſe, cum homo ille, qui auro corruptus cæcitatem ſimulabat, ſimulac Cirolas, miraculum ſcilicet pro confirmanda Arianorum doctrina editurus, manus ejus oculis imponeret, cum magna Thaumaturgi ſui Epifcopi confuſione viſu vere orbatus fuerit, quem tamen paulo poſt, cum orthodoxam fidem profeſſus fuiſſet, ope Eugenii Vindemialis & Longini recuperavit. Eadem vel ſimilis ſaltem hiſtoria ab eodem Gregorio in libro de gloria Confefſorum *q)* memoratur. Nec in Gentilium hiſtoriis cæcos hujusmodi ſuppoſititios deeſſe deprehendimus. Refert enim in Veſpaſiano ſuo Suetonius *r)*, quod quidam luminibus orbatus ſedentem pro tribunali Imperatorem adierit, opemque valetudinis oraverit demonſtratam a Serapide, quem ſibi per quietem indicaffe dixit, reſtitutum iri oculos, ſi Imperator inſpuere dignaretur; nec eventum huius rei, cum eam hortantibus amicis Imperator tentaffet, deſuiſſe. At quamvis Tacitus *s)* hanc cæci hominis curationem Imperatoris ſputo factam non fabuloſam eſſe nobis perſuadere velit, dum eam etiam poſt Imperatoris mortem ab iis, qui interfuerant, nullo mendacii pretio relatam ſcribit, proclivius tamen eſt credere, quod ex compacto omnia geſta fuerint, & adulatores Imperatoris hominem quendam venalis fidei, ut cæcitatem mentiretur, pretio corruperint, quam quod Imperator oris ſui excrementis effecerit, ut homini vere cæco reluxerit dies. Sed talis ſimulata cæcitatſ ſuſpicio nullum hîc in Diſcipulorum animis locum habuit, qui calamitatem hujus hominis ſatis noverant, etſi cauſam hujus calamitatis non æque noſſent, eamque a Magiſtro ſuo cognoscere averent.

p) libr. 2. hiſt. c. 3. *q)* c. 13. T. XI. B. B. P. P. p. 874. *r)* c. 7. *s.)* lib. 4. hiſt. c. 81.

§. XXII.

Supponebant tamen tanquam certum & indubitatum ſingulare hoc malum

malum a singulari quodam peccato ortum ducere, incertitantum, utrum ipsi cæco an ejus parentibus calamitatis hujus meritum tribuendum esset. Hinc igitur quæstio: *quis peccavit, ut hic cæcus nasceretur?* In quibus verbis ellipsin occurrere notat Glassius *t)*, cum sensus horum verborum sit: *quis peccavit tale ac tantum peccatum, propter quod cæcus ille natus est?* Qua ellipsi tamen opus non erit, si cum Erasmo Schmidio *u)* vocem ἀμαρτάνειν hoc loco idem significare dicamus, quod peccando mereri. Voculam autem ἵνα in hac Discipulorum quæstione non causam finalem sed ἐκβασιμ seu eventum denotare idem Glassius alibi *x)* observavit. Neque tamen omnis causæ significatio hic excludi debet, cum Discipuli hanc cæcitatem non solum consequens, sed etiam effectum peccati tantamquam causæ fuisse existimaverint.

t) lib. 4. Phil. 8. tract. 2. obs. 3. *u)* declar. N. T. ad Matth. XVIII, 15. p. 267.

x) libr. 3. tract. 7. c. 19.

§. XXIII.

Non solum autem in genere quærunt Discipuli, quis peccaverit, sed generalem hanc quæstionem in duo specialia membradividunt, quorum prius est, num ipse cæcus hanc sibi calamitatem peccando accersiverit? Et vulgaris quidem erat apud Judæos opinio, quam etiam Apostoli imberant, neminem aliquod singulare malum aut damnum pati, quin illud ob singulare aliquod peccatum pateretur, quemadmodum Galilæi quos Pilatus trucidavit, nec non octodecim illi, quos subito & tristi casu ruina turris ad Siloam prostravit, ob enorme aliquod peccatum hanc calamitatem passi dicebantur Luc. XIII, 1. & seqq. Quin etiam peccatores dici solitos fuisse quos grave aliquod infortunium oppressit ex 1. Reg. I, 21. & 2. Reg. VII, 9. colligi posse Danieli Heinsio *y)* videtur, qui etiam in Aristarcho *z)* illud Maimonidis adducit: *vere dixerunt sapientes Magistri nostri: non est mors absque peccato, nec sunt castigationes absque delicto.* Putat quoque Discipulorum animis obversatum illud, quod 2. Sam. V, 8. legitur: *ὅτι τοῦ Φλῆς καὶ χωλὸς ἔπ' εἰσελεύσεται εἰς ὄικον Κυρίου.* Verum id petitum longius videtur.

y) Exercit. S. in N. T. libr. 4. c. 7. *z)* part. 2. c. 9. p. 905.

§. XXIV.

Cum vero hic cæcus, de quo Discipuli quærebant, a nativitate sua hoc malo laboraverit, antequam quicquam vel boni vel mali sciens & volens agere posset, haud parum solliciti sunt interpretes, quomodo in animis Discipulorum hæc cogitatio suboriri potuerit, quod homo ab utero

cæcus

cæcus singulari aliquo peccato in hanc miseriam se conjecerit. Et Sandius quidem hac Discipulorum quæstione ad statuminandum errorem suum de præexistentia animarum abutitur. Nam in tractatu suo de origine animæ *a)* inter argumenta suæ sententiæ & hoc adducit, quod nisi Discipuli Christi ita sensissent, temere Magistrum suum de cæco interrogassent, utrum ipse peccasset, an ejus parentes, ut cæcus natus esset. Nec primus fuit Sandius, qui Discipulorum verba sic interpretatus est. Refert enim Hieronymus in epistola ad Demetriadem de virginitate servanda *b)*, fuisse qui dicerent: *compellimur, ut dicamus, animas fuisse in celestibus, & propter quædam antiqua peccata damnatas in corporibus humanis, & ut ita loquamur, sepultas, nosque in valle lacrymarum pœnas luere veterum peccatorum. Unde & Propheta dicit: priusquam humiliarer ego peccavi c), & : educ e carcere animam meam d) & : iste peccavit, ut cæcus nasceretur an parentes ejus?* Addit Hieronymus, impiam hanc & sceleratam doctrinam olim in Ægypto & Orientis partibus versatam adhuc sua ætate quasi in foveis viperarum absconditam hæreditario malo in paucis serpere ut ad plurimos perveniat. Ægypti autem mentionem dum facit, ad Origenem respicit, a quo animarum *πρὸ ὕλης* assertam fuisse loca in ejus scriptis plurima testantur. Ubi autem ex nostro loco animarum præexistentiam probaverit, Hieronymus non indicat, vix tamen dubitamus, quin in ipsis ad Johannem commentariis id factum fuerit, in quibus ea hodie desiderantur, quæ in cap. nonum commentatus est.

a) p. 105. *b)* epist. 8. c. 9. *c)* Ps. CXIX, 67. *d)* Ps. CXLII, 8.

§. XXV.

Miratur vero Huetius in suis Origenianis *e)* stuporem Origenis, qui, cum Discipulorum quæstionem ad sui delirii defensionem usurpaverit, ad Christi responsum haud attendit, ex quo haud difficulter intelligere potuisset, cæci hujus calamitatem aliunde quam ex peccatis, quæ vitam ejus præcesserunt, derivandam esse. Id Sandius quoque sibi dictum putet, qui Christum Discipulorum suorum de præexistentia animarum sententiam non improbasse, sed approbasse perperam contendit. Certe si sensus quæstionis Discipulorum hic fuisset: num hic peccavit, antequam ejus anima in corpus immitteretur? etiam responsum Christi cæcum hunc peccasse negantis ita explicandum esset: nequaquam cogitare debetis hominis hujus animam ante suam cum corpore unionem peccato aliquo commissio, ut cæcus nasceretur, meruisse.

e) libr. 2. c. 2. qu. 6. p. 95.

§. XXVI.

Probe id intellexit Cyrillus Alexandrinus, qui, etsi Discipulos in Græcorum, animas præexistere asserentium, errore versatos, vel saltem de eo, cum Christum quærent, cogitasse putet, eundem tamen à Christo Discipulis respondente confutatum animadvertit, ut ex libro 6. commentariorum ejus in Johannem (f) græco-latinae editionis patet. Cæterum Cyrillus sententiam de animarum præexistentia Græcorum errorem appellat, quia Plato & ante eum Pythagoras aliique Græcorum Philosophi hoc dogma Origeni propinarunt, ut Hieronymus (g) & ipse Origenes (h) testatur. Tantum verò abest, ut hunc Græcorum errorem Cyrillus Origenis exemplo sibi sequendum duxerit, ut potius suum sive Patrum sive Avunculum & quondam in Alexandrino Episcopatu antecessorem imitatus ab isto dogmate plane abhorruerit, & alibi (i) plurimis argumentis, refutaverit, quæ ut bibliothecæ suæ sanctæ infereret Sixtus Senensis (k) non indigna censuit. Cyrillo Alexandrino *ὁμολογησας* Isidorus Pelusiota Discipulos Christi de peccato cæci interrogasse scribit, quia Græci tradiderunt, *ἐν Φάλθα τὰς ψυχὰς, καὶ διὰ τὸ εἰς σῶμα καταπεπέμφθαι κολαδινομένας* (l), *animas peccasse, & luendarum pænarum causa in corpus demissas fuisse*. Quem tamen errorem Isidorus suum non fecit, sed Christi responso reprobatum animadvertit, & ipse quoque in epistola ad Eulogium (m) prolixius refutavit.

(f) c. 1. Tom. IV. Oper. p. 588. (g) epist. 82. (h) lib. 1. contr. Cels. p. 26. (i) lib. 1. comment. in Joh. c. 9. p. 72. sequ. (k) libr. 5. annot. 185. (l) libr. 2. ep. 272. (m) lib. 4. ep. 163.

§. XXVII.

Attamen de eo quoque dubitari possit, an animis Discipulorum Christi error ille Græcorum obversatus fuerit, cum Christum quærent, an cæcus hic peccasset. Certe Theophylactus (n) negat, Christi Apostolis errorem Gentilium in mentem venisse, quod anima ante corpus in alio mundo versans peccet, ac deinde in corpus descendens peccati poenam luat. Rationem, cur Apostolis hoc dogma incognitum fuisse censuerit, hanc addit: *Ἀλλοῖς γὰρ ὄντες ἔδὲ ἤκουσαν ἀν τοῖς ἰσὺν ἡ ἐπεὶ τοῖς ταῦτα τῷ Φιλοσόφῳ τὰ δόγματα*, h. e. *Piscatores enim cum essent, neque audiverant tale quippiam, quia hæc Philosophorum dogmata erant*. Et hanc Theophylacti rationem invalidam quidem agnoscent, quotquot *περὺ παρξιν* animarum etiam Judæis cognitam fuisse asserunt, quemadmodum

Clericus (o) diu ante Christi adventum a Judæis animarum præexistentiam creditam fuisse ex libro Sapientiæ VIII, 19. 20. probari posse statuit, qua ratione & Hugo Grotius locum illum explicavit. Veruntamen haud opus esse, ut autorem libri Sapientiæ his verbis ad animarum præexistentiam respexisse dicamus, Calovius in bibliis suis illustratis ad illum locum annotavit. Et quamvis Judæi a dogmate illo Gentilium haud prorsus alieni fuerint, unde traditio de animabus in Goph sive Guph, quo nomine animarum simul creatarum & successive corporibus illabentium repositorium appellatur, nata fuit, cujus in Talmude aliisque Rabbinorum scriptis mentionem fieri Pocockius (p) in appendice notarum miscellanea ad portam Mosis observat, probari tamen non potest, quod Judæi animas ante suam in corpora infusionem peccasse cum Gentilibus crediderint, cum loca, quæ Sandius aliique pro animarum præexistentia ex Judæis afferunt, peccata præexistentium animarum non involvant, ut Bebelius (q) recte observavit, sicut & Jacobus Thomasius in oratione opposita errori de præexistentia animarum (r) Cabalistas in eo sapuisse notat, quod non omnia perversi dogmatis capita ad se rapuerint, & nequiquam cum Gentilibus animas, antequam corpora ingrederentur, peccasse statuerint. Si autem probari non potest, Judæos statuisse, quod animæ simul a Deo creatæ, antequam corporibus infunderentur, peccatis se contaminaverint, dici etiam nequit, quod Discipuli cogitaverint, animam hujus cæci, antequam in corpus delaberetur, peccasse, & ob peccatum in corpus hoc notabili defectu miserabile detrusam fuisse. Unde Lightfootus (s), cum loca quædam de Guph animarum produxisset, se non esse tam oculatum dicit, ut videre possit, quid ad quæstionem Discipulorum animarum ab initio mundi creatarum repositorium faciat, nisi vel animas peccatis contaminatas in corpora descendere crediderint, vel μετ' ἐμψύχωσιν supposuerint.

(n) comm. in Joh. p. 692. (o) annot. ad N. T. p. 293. (p) p. 104. (q) tract. de præexist. anim. p. 57. (r) p. 43. (s) Hor. Talmud. in Joh. p. 638.

XXVIII.

Nonnulli ergo statuunt, Apostolos Christum interrogasse num anima hujus cæci, cum prius in alio corpore versaretur, peccaverit. Placet hoc Theodoro Beza (t). Quærit enim, quomodo cæcus hic peccare poterit, antequam nasceretur? Respondet autem: *imbuti erant Judæi dogmate*

mate μετεμψυχώσεως, quod dogma Kimbi ad Ps. 104. credi ab iis tradit quos Sapientes Mecar appellat, & jam olim fortasse Pythagoras in Ægypto didicerat. Quinam fuerint Sapientes Mecar explicat Drusius (u) in suis observationibus, & his ipsis Drusianis observationibus Bezam debere, quæ ex Davide Camio seu Kimchio annotaverat, Drusius in Præteritis suis (x) scribit, ubi & ipse hanc interpretationem tanquam probabilem assumit. Discipuli, inquit, forte quærunt, an ipse peccaverit, nempe cum anima ejus esset in corpore priore, ut propterea redierit in corpus aliud cæcum, Deo sic puniente peccatum illud, quod in vita commiserat. Dicit tamen se hoc ponere non statuere. Idem in altera parte annotationum (y), de hac Discipulorum quæstione iterum agens, Gentiles quosdam, qui dogma μετεμψυχώσεως foverunt, allegat, Pythagoram, Druidas, & Poëtam, cujus nomen sibi ignotum esse dicit. Est autem Poëta ille, ut ex adductis versibus patet, Ovidius, qui in Metamorphoseon libris (z) Pythagoram de animarum transmigratione differentem introducit. Ibidem Drusius conferri cupit, quæ ad Matth. XVI, 14. annotavit. Quo loco in priore annotationum parte (a) observat, eos, qui Christum vel Johannem Baptistam, vel Eliam, vel Jeremiam, vel alium Prophetam esse censuerunt, forte credidisse, quod Johannis, vel Eliæ, vel Jeremiæ, vel alterius Prophetarum anima in ejus corpus redierit, quemadmodum Judæorum Physici seu Sapientes Mecar ejusmodi transmigrationem animarum statuerunt. Addit ad eundem Matthæi locum in posteriore annotationum parte (b), cognata hæc esse cum iis, quæ nonnulli de revolutione animarum scribunt, fingentes, per tria corpora eas volutari, sicut Adami animam Davidis quoque & Messiae corpori communem faciunt, quod tribus literis nominis דָּוִד significari dicunt, ita ut prima litera ipsum Adamum, secunda Davidem, tertia Messiam denotet. Quam revolutionem מְשִׁיחַ מְדָבָר seu revolutionem animarum appellari dicit ad differentiam alterius revolutionis, quæ cavernarum dicitur, quia corpora Judæorum extra terram Canaan defunctorum per cavernas & abditos terræ meatus in Palæstinam usque, ut ibi resurgant, volutanda perhibentur.

(t) annot. ad N. T. p. 363. (u) libr. 4. c. 6. (x) lib. 4. p. 134. (y) p. 87. (z) libr. 15. (a) p. 36. (b) p. 31.

§. XXXI.

Johannes quoque Piscator (c) verba Discipulorum ex hypothesi μετεμψυχώσεως Christi temporibus inter Judæos usitata explicanda ar-

bitratur, nisi quis putet, eos opinatos esse, quod jam olim animæ humanæ in principio mundi omnes creatæ sint, ac interea vel bene vel male agant. Nec alia est Francisci Gomari (d) sententia, qui ex Matth. XIV. 2. & XVI, 14. manifestum esse putat, quod Christi temporibus Judæi animarum transmigrationem crediderint. Nec mirum esse dicit, quod Gentilium Philosophorum error illiteratis Apostolis obrepfit, cum sub Antiocho Judæa Philosophorum scholis corrupta fuerit, & ab eo tempore varii errores in legis Doctores & per hos in vulgus haud difficulter dimanare potuerint. Producit ad confirmandam suam sententiam ex Eliæ Levitæ dictionario traditionem superius memoratam de animarum per tria corpora revolutione, quæ Iobi XXXIII, 20. fundata creditur, item traditionem de anima Eliæ, quam Rabbini olim in Pinehaso fuisse dixerunt. Plures Autores, qui huic sententiæ favent, adducere nolumus, sed alteram etiam partem audiemus.

(c) anal. in Joh. p. 654. (d) Oper. Theol. p. 330.

§. XXX.

Haud enim desunt, qui negant, quod dogma μετεμψυχώσεως Christi temporibus apud Judæos receptum fuerit, & quamvis Josephus (e) Phariseos docuisse tradat, quod animæ hominum εἰς ἕτερον σῶμα seu in aliud corpus transeant, Johannes tamen Camero (f) Josephum nihil aliud significare voluisse existimat, quam quod Pharisei docuerint, animas piorum, cum dies resurrectionis venerit, εἰς σῶμα ἕτερον h. e. in corpus non substantia sed qualitatibus diversum redivituras esse. Loca quoque, quæ Gomarus ex Matth. XIV, 2. & Matth. XVI, 14. adducit, alii minime ita comparata esse arbitrantur, ut ex illis firmiter probari possit, quod Apostolorum ætate inter Judæos metempsychoseos doctrina viguerit. Priorem certe locum ipse Vossius (g), qui alias Judæos illius ævi ab hoc gentilismo non alienos fuisse neutiquam dubitat, ad μετεμψύχωσιν haud spectare judicat, cum Herodes non putare potuerit, Johannis Baptistæ animam in corpus Jesu, quippe quem non infantem, sed adultæ ætatis virum nosset, se insinuasse; sed potius Johannem a morte resuscitatum suspicatus fuerit, nisi quis dicat, quod anima Johannis ita in Jesu corpus transierit, ut priorem ejus animam expulerit, & dominium in ejus corpore occupaverit. Eundem vero sensum etiam in posteriore loco, nec non in parallelis Marc. VI, 14. 15. & Luc. IX, 7. 8. obtinere Maldonatus in commentario ad Matthæum (h) & Toletus in com-

menta.

mentario ad primum Johannis caput. (i) statuunt, ubi tamen observant, quod apud Lucam Johannes Baptista & Prophetæ a mortuis surrexerunt, Elias autem quippe non mortuus apparuisse dicatur.

(e) libr. 2. de bell. jud. c. 12. vel juxta vers. lat. c. 7. (f) prælect. ad Matth. XIX, 3. p. 171. (g) de idolol. libr. 1. part. 2. c. 10. (h) p. 254. (i) p. 118. 119.

§. XXXI.

Sed ponamus in locis illis ad μετεμψύχωσιν respici, etsi id nobis persuaderi nondum potuerit, ponamus etiam Josephum in allegato loco Phariseis dogma illud tribuere, quod utique Josephi verbis magis convenire haud diffitemur, necdum tamen evictum est, Discipulos cogitasse, quod anima cæci, priusquam in corpus hoc oculorum lumine privatum ingrederetur, in alio corpore peccaverit. Nam Pharisei, Josepho referente, tradiderunt, ψυχὰς μεταβαίνειν εἰς ἑτέρον σῶμα, τὰς τῶν ἀγαθῶν μένον· τὰς δὲ τῶν φάουλων αἰδῶ ἡμῶν κολάζεσθαι, *animas transire in aliud corpus bonorum tantum, malorum autem æterna pœna cruciari*. Si enim animæ piorum tantum in alia corpora migrant, probabile non est, in animis Discipulorum hanc suspicionem obortam fuisse, quod hic cæcus peccatum in aliis corporibus patratum nunc luere cogeretur.

§. XXXII.

Excipiet forte aliquis, Phariseos quidem tantum animabus piorum, reliquos autem Judæos etiam animabus impiorum transitum in alia corpora tribuisse, sive humana, sicut Labanis anima in Bileamum transiisse perhibetur, sive brutorum, e. g. leporum, camelorum & aliorum pro diversitate vitiorum, quibus se contaminarunt, & quibus vel has vel alias brutorum species imitati sunt, qualem animarum transmigrationem Cabalistas tradidisse Elias supra allegatus retulit, quemadmodum eandem & Pythagoras docuit, qui propterea brutorum carnibus vesci vetuit, *veritus*, juxta Tertullianum (k), *ne bubulum comedens de proavo suo obsonaret*. Verum quicquid de diversitate inter Phariseos & Cabalistas circa hoc doctrinæ caput, quicquid etiam de metempsychoseos judaicæ antiquitate statuatur, certum tamen est, tale esse hoc dogma, ut illud Apostolis tribuere nimis grave & inhumannū videatur. Tanta enim absurditate laborat, ut nonnulli etiam Pythagoram & alios Gentiles Philosophos ab errore tam crasso absolvere conentur. Multo magis Apostolis ejusmodi errorem tribuere veremur, quo posito gravissimus de resurrectione mortuorum articulus funditus evertitur. Temere contra resurrectionem

mortuorum Sadducæi hac quæstione scrupulum movebant: utrius conjugis futura esset uxor, quæ septem fratribus nupserat? quasi in altera vita adhuc conjugio locus relinqueretur. At ex metempsychosi longe gravior & difficilior quæstio nascitur: utrum corpus ingressura sit anima, quæ saltem per tria corpora volutata fuit? Cui dubio solvendo multum quidem operæ Menasse Ben Israel (l) impendit, at quam infelix ejus conatus fuerit, Hoornbeeckius (m) ostendit. Quamobrem ratio nobis deesse haud videtur, si metempsychoseos errorem discipulis Christi tribuere Cameronis exemplo vereamur, quem Lactantius (n) tam ridiculum esse dicit, ut ne refelli quidem mereatur. Cum enim Pythagoræ sententiam recensuisset, statuentis, migrare animas de corporibus vetustate ac morte confectis, & insinuare se novis ac recens natis, statim subjicit: *que sententia deliri hominis, quoniam ridicula & mimo dignior quam schola fuit, ne refelli quidem serio debuit, quod qui facit, videtur vereri, ne quis id credat.* Nec desunt inter Judæos, qui absurditatem Pythagorici hujus dogmatis agnoscunt. Benjamin enim Tudelensis in itinerario (o) suo nationem quandam describens, quam Dogzin appellari scribit, inter alia refert, quod putaverit animam, cum ex alicujus probi corpore migrat, occupare corpus cujusdam pueruli, qui eo momento, quo anima e corpore migrat, nascitur, sin ex improbo discedat, occupare canis aut jumenti corpus. Et hoc ipso dogmate paganos illos stoliditatem suam abunde prodere Benjamin judicat.

(k) apolog. c. 40. (l) lib. 2. de resurrect. mort. c. 18. (m) de convinc. Jud. libr. 8. c. 3. (n) lib. 7. instit. divin. c. 12. (o) p. 34.

§. XXXIII.

Cum vero Camero a nonnullis objici videret, verba Discipulorum intelligi non posse, nisi ea ad μετεμψύχωσιν respicere fateamur, varias rationes in medium adduxit, quibus Discipulorum quæstionem explicari posse arbitratur. Primum enim Discipulos de peccato τυφλῶ ἐκ γυναικὸς quærentes peccatum originis ob oculos habere potuisse existimat, quam explanationem etiam in myrothecio suo evangelico ad hunc Johannis locum repetit. Et minime quidem dubitamus, quin Apostoli in Christi schola fideliter informati meliorem hujus articuli notitiam habuerint quam Pharisei, qui etsi ad cæcum hunc dicerent: ἐν ἀμαρτίαις σὺ ἐγενήθης ἅλ. in peccatis totus natus es v. 34. semet ipsos tamen in peccatis natos spiritualiter cæci non videbant. Neque negari potest, peccatum originis genera-

nera-

Druſon

neralem omnium calamitatum causam esse, quibus humanum genus premitur, & ex hoc fonte etiam in parvulos varia morborum genera derivari. Unde Augustinus (p) Pelagianis dicentibus *naturam humanam in exordiis nascentium innocentia dote locupletem* respondet: *fatemur sane, quantum ad peccata pertinet propria, cum autem etiam originali negatis obnoxios, respondete, quo merito tanta innocentia nonnunquam ceca, nonnunquam surda nascatur?* Veruntamen Discipuli Magistrum suum Jesum hic non interrogarunt de peccato, quod cæcus hic cum parentibus suis commune habuit. Distincte enim quærun, num hic cæcus, an ejus parentes peccaverint? Si originale peccatum ob oculos habuissent, potius quærendum ipsis fuisset, cur non omnes homines cæci nascantur? Si quis autem putet hanc Discipulorum mentem fuisse, num hic cæcus ob solum originale peccatum hac calamitate afflictus fuerit, an etiam singulari cuidam parentum ejus peccato cæcitatæ hujus causa adscribi debeat, opponi poterit, quod Christus cæcum hunc peccasse neget, quod dicturus minime fuisset, si quæstio Discipulorum ad originale cæci peccatum respexisset.

(p) libr. 3. contr. Julian. c. 4.

§. XXXIV.

Altera Cameronis explicatio in Dei præscientia fundatur. Ait enim Discipulos haud absurde cogitare potuisse, ut sunt omnia Deo præsentia, quod præviderit Deus multo ante, qualis cæcus hic futurus esset, ac proinde Deus cum hoc cæco egerit, quemadmodum cum impio Rege Jeroboamo, cui manus in Prophetam intentanti Deus gravem poenam inflixit, ut atrocitatem designati sceleris & cohiberet & puniret, quæ Cameronis explicatio itidem in myrothecio ejus evangelico iteratur. Eandem sententiam Leontio tribuit Maldonatus (q) his verbis: *Leontius putat, non interrogare Discipulos de præterito, sed de futuro peccato, non enim ignorasse, antequam nasceretur peccare nequaquam potuisse, sed existimasse Deum futurorum præscium, cum prospiceret fore ut natus peccaret, effecisse, ut in futuro peccati pœnam cæcus nasceretur.* Sed quis ille Leontius, aut ubi ita senserit, neque Maldonatus, neque Cornelius a Lapide (r) hanc Leontii sententiam itidem referens, nec alii, quos vidimus, annotarunt, nisi quod Theophilus Raynaudus in hoplothea contra ictum calumniæ (s) quem alii simpliciter Leontium nominant, Leontium Euthalium appellat. Alias novimus Leontium Byzantinum in tractatu de scetis (t) Origeni præexistentiam animarum ex hominibus, qui cæci nascuntur,

scuntur, probanti, respondere: *Ταῦτα κριματά εἰσι Κυρίῃ, καὶ δὲ ἡμᾶς
ταῦτα μὴ ζητεῖν, hæc Dei judicia sunt, quæ inquirenda non sunt.* Novi-
mus etiam extare Leontii sive Presbyteri Constantinopolitani, sive Nea-
poleos Cypri Episcopi orationem in festum mediæ pentecostes & in cæ-
cum a nativitate, quam Franciscus Combesius latine in bibliotheca con-
cionatoria (*u*) & græcè ac latine in novo auctario græco-latinae Patrum
bibliothecæ (*x*) edidit, & cujus loca quædam ex MSCto codice Vindo-
bonensi emendat & supplet Lambecius (*y*). Sed in ea oratione de pœna
cæcō ob prævisum a Deo peccatum inflictâ nihil legitur, cum ibi tantum
Leontius contra Judæos disputer, qui cæcū a Christo sanatum ὑποβολι-
μαῖον & supposititium vocabant, iisque divinam virtutem Christi ex ejus
miraculis demonstret. Ubi verò illa Leontii a Maldonato allegata sen-
tentia legatur, & quis sit Leontius ille Euthalius a Raynaudo allegatus,
sitne idem cum Leontio, quem Turrianus in tract. contra Magdeburgen-
ses (*z*) Leontium Ætolum, & in notis ad constitutiones Apostolicas (*a*),
nec non in tractatu de eucharistia (*b*) Leontium Eutholium appellat, an
diversus, aliis nunc inquirendum relinquimus, cum Leontium illum sive
Euthalium sive Ætolum, sive Eutholium nunquam videre nobis licuerit,
& ne nomen quidem illius, nedum ætatem & scripta illi annotaverint,
qui ex instituto de Scriptoribus ecclesiasticis egerunt, & in his quoque ce-
leberrimus Cave nec in priore, nec in altera historiæ suæ literariæ parte,
quam diu ab erudito orbe desideratam hoc anno 1698. Londini publica-
vit, ullam ejus mentionem fecerit. Unde soli Turriano hujus Scriptoris
notitiam debemus, ex quo discimus, quod commentarium in quatuor ev-
angelia græce scripserit, & Theophylactus pleraque in suis commentariis
ex eo hauserit. Fides sit penes Turrianum, quem alioquin semper præsto
habuisse inauditos & cæteris præter ipsum mortalibus invisos codices,
quibus pro libidine uteretur, Dallæus (*c*) animadvertit, qui etiam alibi (*d*)
de Turriano scribit, quod Eusebium Alexandrinum in sermonibus, Ma-
gnetem ad versus Theosthenem, Theophanem in symphonia veteris &
novi Testamenti, & alias hujusmodi Scriptorum in ecclesia hætenus in-
auditas larvas pro libidine effictas adversariis suis tanquam totidem μορ-
μολυκῆα objecerit. Eadem de Turriano est Blondelli (*e*) opinio, di-
centis, solenne ipsi esse manuscriptos codices jactare, novasque lectio-
nes comminisci, quandocunque aqua hæret. Nolumus tamen dubi-
tare, quin Turrianus aliquem Leontii in evangelia commentarium manu-
scriptum

scriptum ad manum habuerit, cum etiam Maldonatum eo frequenter usum deprehendamus. Sed hæc obiter. Quicquid autem sit de Leontio, certum est, hanc sententiam, quod cæcus ex sententia Discipulorum ob prævisa a Deo peccata talis natus fuerit, alios quoque præter Cameronem patronos invenisse. Nec alienus fuit ab eo Dionysius Carthusianus. Postquam enim dixerat, Discipulos utpote simplices simpliciter quæsisse, subjicit, quod Discipuli potuerint loqui vel de peccato consequenti, vel de originario, quasi dicerent: *natusne est cæcus propter prævisum a DEO peccatum, quod post nativitatem commisit, an propter peccatum originarium &c.* f) Cæterum exemplum Jeroboami a Camerone adductum non est cæco nostro parallelum, quia in Jeroboamo Deus conatum sceleris punivit, & ne plenius erumperet impedivit, qualem conatum in hoc cæco, antequam nasceretur, fuisse, nemo dixerit.

g) pag. 747. r) pag. 391. s) Tom. XII. Oper. p. 668. t) act. 10. p. 552. u) fer. III. post Quadrag. Tom. III. p. 113. x) T. I. p. 719. y) T. IV. biblioth. Vindob. p. 71. z) p. 455. & 498. a) p. 219. b) pag. 87. & 117. c) de usu Patr. pag. 26. d) de pseudepigr. pag. 692. e) pseudo-Isidor. pag. 56. f) Barrad. T. III. concord. p. 80.

§. XXXV.

Et ipse quoque Camero in duabus his explicationibus non acquiescit. Cum enim verba Discipulorum vel de peccato originis, vel de præviso aliquo peccato singulari exponi posse dixisset, subjungit: *sed nihil opus est huc devenire, res est expedita & facilis. Res mira videbatur Discipulis, quempiam nasci cæcum, cum omne malum, quod docendi causa passivum appellamus, peccati pœna esse videatur, hoc autem malum non possit in hoc genere censerī. Nam ut infans, qui nondum ullo scelere peccata patris imitatus est, peccati pœnas a Patre admissi luat, videtur duriusculum, tum etiam ut statuatur, ullo peccato a se admissio, cum nondum peccarit, hoc malum accersivisse, pariter absurdum videtur.* Arbitratur ergo Camero, Discipulorum quæstionem non sic intelligendam esse, quasi putaverint, vel ipsius cæci vel parentum culpa hoc malum ipsi accidisse, sed quæstionem potius inde natam esse, quod neutrum fieri posse existimarent. Eadem est Euthymii Zigabeni g) interpretatio, qui verba Discipulorum hoc modo *παρὰ τῶν μαθητῶν*: *paralyticus quidem propter peccata sua egrotabat, sicut ibi didicimus, de hoc autem quid dicis? quis peccavit, hic an parentes ejus?* nos enim neque hoc neque illud di-

cere possumus omnino conturbati consilioque destituti. Quam interpretationem ex Chrysostomo hausit. Cum enim ille absurdam Discipulorum quaestionem vocasset, quaerit, quomodo ad eam devenire potuerint? Respondet autem eos memoria tenuisse, quod Magister eorum ad paralyticum dixerat: *ecce sanus factus es, noli amplius peccare* Joh. V, 14. sed quid de hoc caeco dicerent non invenisse, cum neque ipsum caecum peccare ante nativitatem potuisse putaverint, neque pro patre filium puniri crediderint *b*).

g) Bibl. Patr. Lugd. Tom. XIX. p. 695. *b*) homil. 55. in Joh.

§. XXXVI.

Si Johannem Crellium audiamus, Discipuli de parentum culpa minus quam de ipsius caeci peccato dubitarunt. Simplicissimum ipsi videtur, si interrogationem istam ita accipiamus, quasi dixerint: *cum sciamus peccata esse causas hujusmodi calamitatum, vellemus scire, quis in hoc peccaverit, illene ipse, quod est minus verisimile, imo videtur nobis impossibile, an potius parentes illius, qui cum sint ipsi conjunctissimi, forte ille ipsorum scelera luit, & in illo ipsi puniuntur* *i*). Existimat ergo, Discipulos priorem suae quaestionis partem dicis tantum causa protulisse, & statim transmisisse, ac in alteram propendisse.

i) Tom. III. Oper. pag. 94.

§. XXXVII.

Johannes Lightfootus cum in horis suis Talmudicis ad hunc locum sententiam de praëxistentia animarum, & earundem in alia corpora transmigratione removisset, duas alias Judæorum hypotheses ex ipsorum scriptis adducit, ad quas Discipulos in sua interrogatione respectum habere potuisse arbitratur. Prior est traditio de diebus Messiae, in quibus neque meritum neque demeritum futurum in Vajkra Rabba scribitur, quod Lightfootus ita exponit, in diebus Messiae ex Judæorum mente neque meritum Parentum in bonum, neque culpam in malum imputatum iri. Quibus positis verba Discipulorum hac paraphrasi explicat: *Magister, novimus te esse Messiam, & dies hosce esse dies Messiae, & didicimus ex scholis nostris non esse imputationem meriti vel culpae patrum vel parentum in diebus Messiae. Unde ergo hic natus est caecus, ut hisce diebus gestet notam imputationis alicujus culpae, an parentum? hoc excluditur per commune adagium. Videtur ergo quod reatum gestet propriae culpae. Anne hoc ita? Altera Judæorum hypothesis, ex qua verba Discipulo-*

pulorū explicari posse notat, est opinio de peccatis infantum in utero adhuc constitutorum. Dicit enim autumasse Judæos, quod infans in utero matris jam animatus & vivens irregulariter se gerere, & aliquid facere possit, quod culpa haud vacet. Producit eam in rem varia ex Judæorum scriptis testimonia, tandemque concludit, huc etiam verba Discipulorum spectasse quærentium: *num hic peccavit, ut cæcus nasceretur? hoc est, num ille, dum cum in utero gestaret mater, fædum aliquid aut enorme perpetravit, ut cæcitatem ejus rei pœnam secum tulerit in mundum?*

§. XXXVIII.

Barradius *k)* existimat, quicquid in Discipulorum quæstione absurdi occurrit, eorum negligentia tribuendum esse, cum non attenderint, quid ex ipsorum interrogatione sequeretur. Lyserus in exegeticis suis disputationibus, quibus Johannem illustravit *l)*, dicit, quæstionem hanc institutam fuisse a Discipulis partim scientibus, quandoque homines vel propter propria, vel propter aliena parentum peccata castigari, partim ab ignorantibus, non omnes calamitates ob peccata infligi, quam ignorantiam Apostolos cum aliis Judæis communem habuisse notat, hoc ex ipsorum Mischnajoth præceptum adducens: *qui viderit mancum, cæcum, lato capite, claudum, erysipelate affectum, albuginosum, dicat: benedictus sit Judex justitiæ.* Quæ vero de Discipulis partim scientibus partim ignorantibus dicit, eadem apud Toletum quoque in c. 9. ad Johannem commentariis leguntur.

k) Tom. III. conc. evang. p. 80. *l)* in c. 9. th. 8.

§. XXXIX.

Et omnino hoc alte Discipulorum mentibus insedit, quod ejusmodi corporis defectus ab enormi aliquo peccato ortum ducant, quam sententiam Scripturæ sacræ conformem censuerunt. Noverant enim DEUM Israelitis promisisse, quod plagas Ægyptiorum illis haud impositurus esset, dummodo voci ejus obedirent, contra vero legis suæ transgressoribus varia morborum genera & alias calamitates comminatum fuisse. Confirmati sunt in hac sententia, cum recordati sunt, Christum paralytico dixisse: *confide, fili, remissa tibi sunt peccata tua* Matth. IX, 5. & alteri: *noli amplius peccare* Joh. V, 14. Ideoque simul ac cæcum hunc viderunt, de peccato ejus quæsierunt. Non solum autem non ignorarunt, non semper insignes calamitates magni alicujus peccati pœnas esse, sed alius quoque error accedebat, dum opinabantur, cæcum hunc, antequam na-

sceretur, gravi aliqua culpa præ aliis hominibus ut in hanc miseriam conjiceretur, mereri potuisse. Unde mirum haud est, quod interrogaverint: num cæcus hic peccasset? Hunc errorem Discipulis tribuere malumus, quam cum Crellio dicere, quod priorem suæ quæstionis partem dicis tantum causa protulerint, aut cum Barradio, quod ad absurdam quæstionis suæ consequentiam non attenderint, aut cum aliis, quod quæstio Discipulorum negationi æquipolleat, ut si quis infantes Bethleemiticos magna strage trucidatos vidisset & exclamasset: quid illi peccarunt? quod perinde esset, ac si infantes illos innocuos & nullo crimine talem lanienam meritos dixisset. Notum est Apostolos aliis quoque erroribus obnoxios fuisse. Quippini ergo & hunc errorem de peccato cæci ante nativitatem possibili fovere potuerunt? Hæc explicatio simplicissima & verbis Discipulorum pariter ac responso Christi convenientissima videtur.

§. XL.

Neque tamen huic sententiæ Discipuli ita inhærebant, ut non parati essent in parentes cæci, si Christus annueret, omnem culpam conjicere. *Putabant enim utrumque fieri posse, quæ Cocceji m) verba sunt, & ut ipse probus ferret aliquam miseriam ob peccatum parentum, & ut ipse malo ingenio præditus etiam corporalem miseriam ferret.* Hinc quærebant: *quis peccavit, hic an parentes ejus?* quasi dicerent: num hic homo jam in utero tam impius & perversus fuit, ut justo Dei judicio, antequam nasceretur, visu privatus fuerit? an parentes ejus peccatis suis hanc ipsi calamitatem attraxerunt? Quem Lucas Osiander in sua paraphrasi sequitur. *Dubium enim ipsis erat, ait Seb. Schmidius in resolutione & paraphrasi evangelii Johannei n), si cæcus peccasset, quomodo ante nativitatem peccasset? sin parentes peccassent, cur non hi potius excacati?* Alterum igitur speciale quæstionis membrum ad cæci parentes spectat, quos Apostoli non minus quam ipsum cæcum & forte adhuc magis de causa calamitatis hujus suspectos habuerunt.

m) Tom. IV. Oper. p. 168. n) pag. 105.

§. XLI.

Et multi quidem inter Patres hanc etiam quæstionis partem absurdam existimant, cum Judæorum error fuerit, filios ob delicta Patrum castigari, ab Ezechiele c. XVIII, 1. seq. refutatus, contra quem etiam legem Mosaicam adducunt, qua cautum erat, ne filius pro parente moreretur. Deut. XXIV, 16. Ac ne quis objiciat, quod Deus minatus est, se peccata pa-

pa-

patrum in filiis ad tertiam usque & quartam generationem vindicaturum esse Exod. XX, 5; respondent, illam sententiam non esse generalem, neque contra omnes dictam, sed solum contra eos, qui ex Ægypto egressi erant. Præterea in illa comminatione per peccata Patrum pœnas Patrum intelligunt, etiam in filios eorum, qui ex Ægypto egressi fuerant, venturas, si post tot signa & miracula peiores evaderent. Ita Chrysostomus & Euthymius ad hunc locum differunt, quibus consentiens Severus in catena Patrum ad Johannem o), Judæos divinam comminationem perperam intellexisse arguit. Ammonius quoque in eadem catena hanc Discipulorum quæstionem explicans ait: ἐσφαλμένη ἐστὶν ἡ ἐρώτησις αὕτη ὅτε ἀμαρτάνει τις πρὸς τὸ γεννηθῆναι, ὁ μὴδὲ ὅλως ὦν, ὅτε ἄλλῃ ὑπὲρ ἄλλῃ τιμωρεῖται, *erronea est interrogatio, cum nemo peccet antequam natus sit, cum tunc omnino non existat, neque alius pro alio puniatur.* Theophylactus etiam ad aliam objectionem depromptam a morte puero- rum, quæ in pœnam parentum sæpius contingit, respondet, quod DEUS propter misericordiam illorum vitam præripiat, ne cum supervixerint parentibus deteriores evadant.

o) pag. 284.

XLII.

Imprimis vero prolixus hic est Cyrillus Alexandrinus in suis ad Johannem commentariis. Ac primum quidem fontem erroris huius, quem putat, judaici ostensurus refert quæ Exodi c. 32. 33. & 34. memorantur, donec ad illa verba pervenit: *Dominus DEUS misericors & miserator, longanimis, multæ misericordiæ, verax & justitiam servans & misericordiam in millia, auferens iniquitatem & injustitiam & peccata. Et non purificabit, inducens iniquitatem patrum super filios, & super filios filiorum in tertiam & quartam progeniem.* Verba hæc, quæ Exod. c. 34. v. 6. & 7. leguntur, non Mosis sed ipsius Dei esse animadvertit, cum ipse Moses Num. XIV, 17. 18. id testatus fuerit. His autem verbis abusos dicit, qui existimant patrum delicta in filios trajici, & iram divinam usque adeo extendi, ut ad tertiam & quartam usque generationem pertingat, de infontibus pœnas alienorum criminum exposcens. Cum autem ne humanæ quidem leges pœnas transgressorum filiis infligant, nisi eorundem criminum consortes deprehendantur, multo minus Deo talem injustitiam imputandam judicat. Hanc sententiam de pœnis liberorum ob peccata a parentibus commissa ab illis Dei verbis plane alienam esse censet, cum in ijs immensa Dei misericordia, bonitas & patientia celebre-

tur. Præterea si Deus injuriarum memor ac tenax asseratur, eos omni spe excidere dicit, qui peccatorum remissionem ab eo flagitant. Quod autem dicitur: *Et mundatione non mundabit reum*, cum puncto interrogationis legendum arbitratur: *numquid non mutatione mundabit noxium?* hoc est: omnino purgabit, quippe longanimis, & misericors, & iniquitates auferens. Denique quod de Patrum iniquitatibus in filios & nepotes ad tertiam & quartam usque generationem deducendis dicitur, itidem de Dei patientia explicandum esse censet, quasi Deus significare voluerit, se pœnas parentum eo usque dilaturum esse. *Fuit verbi gratia contemptor legum & ad audendum projectus*, sunt Cyrilli verba ex versione Johannis Auberti, *adeoque statim plectendus; toleravit tamen hunc patienter Deus; iram debitam nequaquam inferens.* Deinde fuit isti filius impietate & scelere patri æmulus, eumque nequitia superans, sustinuit quoque iram super hoc Deus. Sed enim ex ipso natus est tertius, & tertio quartus, nequaquam majoribus nequitia minor, sed parem cum illis impietatem exercens. Deinceps effundit DEUS desuper iram pridem toti generi & ab initio debitam, satis & vel plus quam oportebat præstolatus. Quam sententiam postea Cyrillus Achabi exemplo illustrat.

§. XLIII.

Sed rectius Theodorus Heracleota in catena Patrum τινές, inquit, διὰ προγονικῆς ἀμαρτίας ἐπλήγησαν, καθάπερ καὶ διὰ τῆς προφῆτης εἰρήλαι· μάτην ἐπ' ἀτάξια τὰ τέκνα ὑμῶν, nonnulli propter majorum delicta puniti fuerunt, quemadmodum dictum est per Prophetam: frustra percussi filios vestros. Quod dictum ex Jerem. II, 30. depromptum est. Sed longe plura eaque clariora dicta eam in rem allegari possunt, quæ etiam multis exemplis in Scriptura S. confirmantur. Nec Gentilibus ignotum hoc fuit. Etsi enim Bion Numinis vindictam in liberis æque ridiculam statueret, ac si medicus ob patris vel avi valetudinem filio vel nepoti remedium adhiberet, alii tamen cum Euripide

τὰ τῶν τεκόντων σφάλμα] εἰς τὰς ἐκγόνους τρέπεσθαι agnoverunt, qua de re plura apud Plutarchum in libro de sera Numinis vindicta videri possunt. Absit vero ut Deum injustitiæ eo nomine arguamus. Salva enim Dei justitia liberos parentum peccata luere Theologi nostri passim ostendunt, e quorum numero nunc adduxisse sufficiat Feuerbornium, qui in fasciculo secundo dissertationum theologicarum p) hanc quæstionem, an Deus posteris & liberis ob majorum & parentum flagitia

pœnas

pœnas infligat, prolixè pertractavit, ubi partim inter liberos pios & impios, partim inter pœnam stricte & late sic dictam, partim denique inter pœnas temporales & æternas distinguendum esse notat.

p) disp. 5.

§. XLIV.

Verba Ezechielis a Patribus adducta hoc tantum probant, quod nulli liberi ob impiorum parentum peccata æternis suppliciis addicantur, & ne temporales quidem pœnæ proprie sic dictæ piis improborum parentum liberis infligantur. Hoc autem non obstat, quo minus ob parentum peccata temporalibus calamitatibus involvantur, quæ etsi respectu impiorum parentum has calamitates in liberis videntium pœnæ loco habendæ sint, piis tamen liberis in bonum cedunt. Verba autem Ezechielis cum verbis, quæ Exod. XX, 5. leguntur, optime conciliari possunt, si dicamus, in illa appendice primi præcepti ad universum decalogum spectante de ejusmodi liberis agi, qui paternam impietatem imitantur. Qua ratione non opus erit, ut locum illum ad Israelitas Ægypto egressos restringamus, quæ Patrum explicatio a generalibus Dei verbis aliena est. Neque lex illa divina, qua cavebatur, ne filiis ob delicta patrum capitale supplicium irrogaretur, Deum impedit, quo minus impiorum parentum liberos sive pios castigare, sive impios punire queat. Nec probanda sunt quæ ad locum Exod. XXXIV, 6. 7. Cyrillus Alexandrinus commentatur. Nihil enim absurdi est dicere, quod ira DEI ad tertiam usque & quartam generationem pertingat, si ætas parentum pejor avis ferat filios nequiores mox daturos progeniem vitiosorem. Et ne his quidem finibus ira Dei ita coerceri potest, ut ad ulteriores generationes progredi non possit. Tertiæ enim & quartæ generationis mentio tantum facta est, partim quia eo usque parentes malis posterorum superstites esse solent, partim quia Deus haud raro impiorum stirpem in tertia vel quarta generatione funditus delevit.

§. XLV.

Quod humanæ leges liberos parentum peccatis non implicitos ab omni pœna liberos relinquant, haud simpliciter verum est. Apud ipsos Israelitas, etsi insontes filii ad capitale supplicium ob paterna delicta rapi non possent, vel saltem ex lege divina non deberent, quicquid impii quidam Reges neglecta illa lege fecerint, sæpe tamen aliis rationibus ob uvas a parentibus comestas dentes sibi obstupefcere sentiebant: quemadmodum liberos ob æs alienum parentum culpa contractum a creditoribus exactos legi-

legimus. Quid aliarum gentium leges circa poenas liberorum ob parentum delicta decreverint, apud Petrum Fabrum in semestribus q) & alios videri poterit. Nos enim illis recensendis jam non immorabimur. Ad alia potius Cyrilli argumenta progredimur, notantes, haud bonam esse hanc ejus consequentiam: Dominus ante Moſis faciem tranſiens Domini clementiam, miſericordiam & patientiam commendat, ergo in ſequentibus verbis de ejus juſtitia agi non poteſt. Cujus illationis infirmitatem omnia illa Scripturæ dicta produnt, quæ cum Dei clementia & miſericordia ejus juſtitiam conjungunt. Neque tamen hoc magnopere urgemus. Eſto totum illud dictum de Dei clementia & miſericordia agere, quod nobis admodum probabile videri haud diſſitemur. Cum enim Deus murmurantem populum internecioni devoveret, Moſes Num. XIV, 18. pro populo ſuo intercedens totum illud dictum repetebat, & Deo quaſi in memoriam revocabat, quibus verbis immenſam ſuam clementiam & miſericordiam celebraret. Convenientius autem omnino huic interceſſioni videtur, immenſas divinæ miſericordiæ & in parcendo bonitatis divitias verbis ex ipſo Domini ore depromptis deprædicare, quam Deum juſtitiae illius commoneſcere, qua neminem in ſontem aut impunem eſſe ſinit. Ideoque hoc non multum improbamus, quod Cyrillus verba Dei καὶ κα-
θαριμῶν & καθαριῶν τὸν ἐνοχόν cum ſigno interrogationis legit, & hac interrogatione ulterius confirmari ſtatuit, quod jam in verbis proxime præcedentibus de ablatione iniquitatum ſeu peccatorum remiſſione dictum fuerat. Quamquam verba illa commodius ſine interrogatione de Dei clementia exponi poſſunt, ſi cum Ludovico a Dieu r) verbum ינקא in evacuandi & totaliter ſuccidendi ſignificatione accipiamus, quaſi Dominus dixerit: ינקא לֹא ינקא & evacuando non evacuat, hoc eſt, tanta eſt ejus miſericordia, ut etiam quando ſuccenſet & punit, non prorsus ſuccidat. Quantum autem ad viſitationem patrum iniquitatum, quæ in filios & nepotes ventura dicitur, attinet, Cyrillus quidem eam, ut vidimus, de dilatione poenæ in tertiam & quartam generationem explicat, quæ ſententia etiam Theodoreto s) haud diſplicuit. Verum verba Domini hanc explicationem non admittunt. Aliud enim eſt viſitare patrum delicta in filiis & filiorum filiis ad tertiam & quartam generationem, aliud patribus & filiis patienter magnaſque longanimitate toleratis iram in tertiam & quartam generationem effundere. Et hiſtoria Iſraelitarum ob peccata ſua in deſerto per varia plagarum genera proſtrato-

stratorum testatur, Deum poenas parentibus debitas non ad tertiam & quartam usque generationem distulisse. Quamobrem si hic etiam verba ad Dei clementiam referre velimus, magis congruum erit dicere, quod iræ divinæ moderationem indicent, qua Deus, qui peccantes funditus abolere poterat, peccata patrum in filiis & nepotibus tantum ad tertiam aut quartam generationem usque visitat. Denique si Cyrillo concederemus, in hoc Exodi loco non de poenis liberorum ob delicta parentum, sed de dilatione poenæ in tertiam & quartam generationem agi, quid quæso ad alia Scripturæ loca respondere posset, quæ liberos parentum peccata luere testantur. Patet ergo Apostolos sine absurditate opinari potuisse, quod liberorum calamitates nonnunquam eorum parentibus debeantur. Nec dubitarunt, nisi ipse cæcus calamitatis suæ causa esset, quin ejus parentibus hujus mali origo tribuenda foret. Hinc ergo quærunt: *ἅτος ἢ γονεὺς αὐτοῦ* 9) libr. 3. c. 8. 7) animadvers. ad V. T. p. 81. 5) quæst. 40. in Exod.

§. XLVI.

Et Hugo quidem Grotius observat voce *γονεὺς* utrumque parentem comprehendi, & respectum haberi ad legem Levit. XX, 18. cujus transgressionem inter gravia peccata Ezechiel c. XVIII, v. 6. numerat. Confirmat hanc sententiam ex eo, quod Hebræi tradant, ex tali concubitu imperfectos partus nasci. Quæ Grotii sententia etiam Hammondo in suis ad hunc locum annotationibus placuit. Verum in genere de parentum peccatis Apostoli quærunt, nec opus est, ut eorum verba ad solum illud peccatum restringamus. Et ob alia quoque parentum peccata liberos nasci mancos, tortos, aliqua sui parte mutilos, aliisque corporis vitiis deformes, doctrina erat in scholis judaicis non rara, qua terrebant parentes, ne negligentiores essent circa ritus, qui munditiam respiciebant, ut judaicarum rerum callentissimus Lightfootus annotavit. Quærunt ergo Apostoli, num si forte cæcus ipse non peccaverit, culpa hujus cæcitatis in ejus parentibus hæreat?

§. XLVII.

Respondit JESUS: neq; hic peccavit, neq; parentes illius, sed ut manifesta fierent Dei opera in illo. Et de hoc Christi responso, tanquam altera exercitationis nostræ parte, nunc etiam paucis agendum erit. Qui responsum dedit, idem ille est, quem ab Apostolis Magistri titulo compellatum

latum & interrogatum vidimus. Ipsum autem responsum, ut Isidorus Pelusiota in Epistola sæpius laudata illud describit, non obliquum aut sinuosum, vel ænigmatum involucris plenum est, sed rectum & quavis perspicuitate dilucidius & splendidius. Quæfiverant Apostoli, num cæcus an ejus parentes peccassent? Respondet Christus, neque cæcum, neque ejus parentes peccasse. Sed aliam hic movet quæstionem Augustinus ^t), *quid est quod dixit? Si enim nullus homo sine peccato, numquid parentes hujus cæci sine peccato erant? numquid ipse vel sine originali peccato natus erat? vel vivendo nihil addiderat? An, quia oculos clausos habebat, concupiscentia minime vigilabant? Quanta mala committunt cæci? A quo malo abstinet mens mala etiam clausis oculis &c.* Et si autem ipse Augustinus ad dubium hoc recte responderit, Chrysostomum tamen audiemus. Sic ergo ille: τὸ δὲ ἔχον ἀμαρτημάτων ἀπαλλάττων αὐτὸς φησιν· ὁ γὰρ ἀπὸ λῶς εἶπε· ὅτε ὁ τοῦ ἡμαρτήεντος οἱ γονεῖς αὐτοῦ, ἀλλ' ἐπήγαγεν· ἵνα τυφλὸς γεννηθῇ, hoc est: *Christus hoc non dixit, absolvens eos a peccatis. Non enim simpliciter dixit: neq; hic peccavit, neq; parentes ejus, sed addidit: ut cæcus nasceretur.* Et si vero in nostris codicibus verba illa: ἵνα τυφλὸς γεννηθῇ Christi responso addita non legantur, quemadmodum in Chrysostomi exemplari addita fuerunt, subintelligenda tamen omnino sunt, & ex quæstione Discipulorum supplenda. Quemadmodum enim alias in Scriptura haud raro negationes non simpliciter negant, sed ex mente vel loquentium vel eorum ad quos oratio dirigitur limitandæ sunt, quales negationes sunt cum Christus ait: *Pater non judicat quengquam* Joh. V, 22. *verbum quod auditis non est meum* Joh. XIV, 25. *Lazari morbus non est ad mortem* Joh. XI, 14. quæ propositiones si absolute & sine omni restrictione intelligerentur, a veritate alienæ essent: pari ratione verba Christi dicentis: neque hic peccavit, neque parentes ejus, ita intelligenda sunt, ut interrogationi Discipulorum respondeant. Quæstio autem Apostolorum erat, num singulare aliquod peccatum vel a cæco vel ab ejus parentibus commissum eoque effectum fuerit, ut homo hic cæcus nasceretur? Respondet igitur Christus, neque hunc neque parentes ejus peccasse, non quod ab omni peccato immunes fuerint, sed quod peccando præ aliis hominibus hanc calamitatem non meruerint.

^t) tract. 44. in Johann.

§. XLVIII.

Ex quibus apparet quam inepta sit Socinianorum quorundam de peccato originali cavillatio. Slichtingius enim hæc Christi verba explicans *u) peccatum*, inquit, *ut apparet, originale Christo non erat notum*. Quæ consequentia si valeret, dici etiam posset, actualia peccata Christo nota non fuisse. Atqui agnoscit Slichtingius de tali peccato Christum loqui, quo factum sit, ut homo ille cæcus nasceretur. Tale autem peccatum in cæco & ejus parentibus esse Christus negat. Idem Wolzogenio respondemus, qui *x)* miratur, cum Christus dicit, neque cæcum neque ejus parentes peccasse, non venisse ei in mentem originale quod vocant peccatum, quod a Christianis esse creditur causa mortis & morborum præcipue in infantibus. Quam de peccato originali sententiam si Christus veram credidisset, ipsum hoc modo minime respondurum fuisse judicat. Sed desinet mirari, si ad ea attendat, quæ in præcedentibus verbis posuit. Notavit enim non simpliciter Apostolos interrogasse utrum cæcus an parentes ejus peccaverint, sed an peccarint, ut cæcus nasceretur, & verba illa, *ut cæcus nasceretur* in responso Christi *ὁτι οὐκ* repetenda esse, & sic Christum negare cæcitatis causam fuisse ullum peccatum vel cæci vel parentum ejus, nequaquam autem negare, quod cæcus & parentes ejus sæpius peccaverint. Quæ cum ita sint, dici etiam non potest, quod Christus his verbis peccatum originale negaverit, quia non de generali morborum aliarumque calamitatum causa, sed de speciali ac propria agebatur. Quod autem Wolzogenius addit, Christum hic simpliciter & diserte negasse, ullum peccatum ac proinde & originale esse causam illius cæcitatis, sive generalem sive propriam, gratis dicitur, unde etiam perperam urget, ut ratio detur, si datur peccatum tale originis, quod sit causa morborum omnium inter homines, cur Christus absolute negaverit, cæcitatis causam esse peccatum vel cæci vel parentum ejus? Absolute enim id Christum negasse pernegamus, cum neget tantum Christus cæcum hunc insigni aliquo peccato, ut cæcus nasceretur, meruisse, & parentes cæci gravi aliquo crimine filio suo causam hujus calamitatis extitisse.

u) in Evang. Joh. p. 75.

x) comment. in Johann. p. 884.

Neque tamen cæcus de injustitia Dei conqueri poterat, quasi hac calamitate affligi non deberet, qui nec ipse peccasset, nec impios parentes habuisset. Recte enim in suo ad Josuam commentario Masius *y*) notavit, neminem jure conqueri posse, judicia Dei nunquam non esse æquissima, ideoque modesto & submisso animo ab omnibus mortalibus suspici, neque ad multiplici errore ac caligine perplexas ratiocinationes exigi debere. Quantum ad cæcum attinet, observat, Christum, cum ait, neque cæcum, neque ejus parentes peccasse, nequaquam vel cæcum vel ejus parentes omnis peccati expertes facere, sed intempestivam Apostolorum curiositatem, qua de aliorum hominum peccatis inquirebant, ad id, quod divina virtute in cæco agere volebat, convertere voluisse. Præterea neminem jure queri posse animadvertit, si non perfectissimi hominis partes atque naturæ instrumenta omnia nascens accepit, siquidem quantulumcunque id est quod accepit, gratuitum plane hoc esse fateri debet. Quin etiam cæcitatem, præsertim si ab ipso ortu insit homini, non tam pœnam dici debere judicat, quam ad multa vitia declinanda utile umbraculum, quo animi acies tanto magis ad Deum intenditur. Unde & Homerus solum Tiresiam apud inferos sapere, cæteras autem animas umbrarum more vagari finxit. Pari ratione Gomar. *z*) ad objectionem, quod Deus injuste agere videatur, si sine meriti peccati ratione afflictiones hominibus immittat, respondet, nullum querelæ de injustitia Dei locum esse, cum Deus neminem affligat, quin peccatis amplius supplicium sit promeritus, nec injuste Deus agat, si dona sua non omnibus communicet, aut data auferat, quippe potestati ipsius subiecta, nec hominibus debita, & præterea ejusmodi calamitates sæpe hominibus plus commodi quam incommodi afferant, sicut huic cæco plus commodi accessit quam defuit, quia DEUS eum hoc bono affecit, ut illustrandæ gloriæ divinæ occasio fieret, & hac via ad salutarem animi visum seu fidem in Christum converteretur. Similia apud Waltherum in harmonia Scripturæ *a*) & Pelargum in quæstionibus ad Johannem *b*) occurrunt, qui postquam quatuor argumentis demonstraverant, justitiam Dei hac cæci calamitate non labefactari, tandem subjiciunt, nobis potius cavendum esse, ne injurii simus vel in Deum, si in causas judiciorum ejus temeraria curiositate inquiramus, vel in proximum,

mum, si contra caritatis officium de ejus calamitatibus earumque causis
 severius æquo judicium feramus. Ex Patribus Chrysostomum rursus au-
 diamus. Quærit ille (c): ergo cæcus propter Dei gloriam injuriam ac-
 cepit? sed respondet: ποίαν ἀδικίαν, εἰπέ μοι, εἰ γὰρ μὴδὲ ὅλως πα-
 ραγαγεῖν αὐτὸν ἐβόλετο; ἐγὼ δὲ καὶ εὐηγγελῆσαι αὐτὸν φημι διὰ τῆς
 πηρώσεως, τὰς γὰρ ἔνδον ἀνέβλεψεν ὀφθαλμούς. Τί γὰρ ὀφείλει τοῖς
 Ἰσδαίοις τῶν ὀνείρων; μείζονα γὰρ κόλασιν ἔχον πηρωθέντες ἐν τῷ
 βλέπειν. Τί δὲ τὸ βλάφει διὰ τῆς πηρώσεως; διὰ γὰρ ταύτης
 ἀνέβλεψεν. *Quam injuriam, dic quaeso, etiam si cum omnino non produ-
 xisset aut formasset? ego vero etiam ex cæcitate beneficium accepisse dico.
 Vidit enim interioribus oculis. Quid oculi Judæis contulerunt? Majus sup-
 plicium cum videndo cæci essent. Quid cæcitas huic obfuit, propter quam vi-
 dit? Et hunc Chrysostomi locum, nisi fallor, imprimis exprimere voluit
 Clichthoveus, cum in supplemento Cyrilli Alexandrini ita differit: scisci-
 tari hic quispiam posset: numquid ille cæcus injusta passus est, quod cæcus na-
 tus fuerit sine culpa? minime profecto, quia potius beneficium accepit per
 hanc cæcitatem, nam & mirabilius visum recepit, quam si a principio
 nativitatis accepisset, & ea occasione interioribus etiam oculis est illumi-
 natus, atque ad Christi fidem integre perductus. Quid enim profuit
 Judæis à vite exordio oculos corporis integros habuisse, cum animo
 prorsus cæcutirent? nonne majus est iste cæcus beneficium assecutus, qui
 ad tempus visu corporis captus postea interius & exterius est videndi
 facultate donatus? Clichthovei hæc verba esse dicimus, etsi a Pelargo
 loco allegato Cyrillo tribuantur. Cum enim Oecolampadio latino
 Cyrillianorum in Johannem commentariorum interpreti ex duodecim
 libris quatuor intermedii quintus, sextus, septimus & octavus defuissent,
 qui nostro demum seculo quoad maximam partem e latebris eruti & Au-
 berti versione donati in lucem prodierunt, Clichthoveus illam quatuor
 librorum lacunam ex aliis Patribus supplevit, quod non attendens Pelar-
 gus Cyrillo tribuit, quæ Jodoco Clichthoveo tribuenda erant.*

y) ad Jos. VI, 21. z) part. I. Oper. p. 331. a) p. 486. b) ad c. 9. qu. 3. c) homil. 55. in Johan. seu juxta Savilian., edit. 56. T. 2. p. 785.

L.

Priorem responsi a Christo dati partem, qua fallam calamitatis in ho-
 mine a nativitate cæco causam removet, hæcenus vidimus, nunc & alte-

ram partem, quæ veram illius calamitatis causam ponit, videamus. Ad-
dit enim: ἀλλ' ἵνα φανερωθῇ τὰ ἔργα τοῦ Θεοῦ ἐν αὐτῷ, *sed ut manife-
sta fierent opera Dei in illo.* Ubi post vocem ἀλλὰ verba quædam ad
supplendum sensum subintelligenda sunt hoc modo: *neque hic peccavit
neque parentes ejus, ut cæcus nasceretur, sed cæcus natus est, ut opera Dei
in eo manifesta fierent, vel etiam: neque hic peccavit, neque parentes ejus,
ut cæcus nasceretur, sed Deus eum cæcum nasci eo consilio permisit, ut
opera Dei in eo manifesta fierent,* quales ellipses etiam occurrunt Joh. XIII,
18. XIV, 31. XV, 25. &c. Voculam autem ἵνα in hoc Christi respon-
so non causam sed eventum notare Chrysostomus observat, quam signifi-
cationem hujus particulæ non inusitatam esse, ex Rom. V, 20. & aliis Scri-
pturæ locis probat. Chrysostomum, ut solet, sequitur Theophylactus.
Hunc enim potius quam Leontium nescio quem Eutholium in suis com-
mentariis excerpit. Idem placet Paulo Tarnovio, Joh. Maldonato, &
plerisque recentioribus Interpretibus. Contra causaliter vocem ἵνα hoc
loco accipiendam esse contendunt Estius in annotat. ad difficiliora Scri-
pturæ loca, Beza & alii. Utraque significatio infra v. 39. in hac ipsa cæci
historia occurrit, cum Christus se ad judicium in mundum hunc venisse
dicit, ut cæci videant, & videntes cæci fiant, ubi particula hæc quoad prius
membrum causaliter, quoad posterius eventualiter intelligenda est. Quæ
autem significatio in nostro loco præferri debeat, operose non disputabi-
mus. Putamus tamen neutram simpliciter rejiciendam esse. Causalis
enim significatio locum obtinebit, si ad Dei permissionem & consilium
respiciamus, qui ad nominis sui gloriam cæco hanc calamitatem im-
mittere voluit, eventualis, si ipsum naturæ defectum spectemus, cujus e-
ventus fuit operum Dei manifestatio.

LI.

Fuit ergo hæc cæcitas non ἀμαρτημάτων ἀντίδοσις seu peccato-
rum retributio, sed ἐτοιμασία τῆς μελλούσης οἰκονομίας seu futuræ
dispensationis præparatio, sive miraculi a Christo faciendi occasio, ut A-
sterius loquitur in homilia superius allegata, in qua eum εὐσεβεῖν Pho-
tius d) pronunciat, quia ex gloria miraculi, quod Christus in cæco ex-
hibuit, divinitatem ejus contra Arianos demonstravit. Et ad hoc ipsum
miraculum a se patrandum Christus digitum intendit, cum cæcitatem
huic

huic homini obtigisse dicit, ut opera Dei in illo manifesta fierent. Patuit enim ex hoc Christi miraculo, qualia & quanta sint Dei opera. Et Theodorus quidem Mopsvestenus *e)*, cujus verba in catena græco-latina Patrum ad Johannem adducuntur, ita Dei opera in cæco manifestata fuisse dicit, ut Christo oculos hujus hominis formante, & ad hanc oculorum formationem pulverem terræ sputo subactum adhibente clare eluxerit, Christum esse verum Deum, qui primum hominem ex pulvere & universum ex nihilo creavit. Verum probari non posse, quod hic cæcus ἀνόμμα^α fuerit, nec oculos prius habuerit, quam Christus eos ex sputo & pulvere formaret, jam supra notavimus. Interim abunde opera Dei in cæco manifestata sunt, cum Christi divina virtute visum, quo ab utero caruerat, accepit. Dei autem opera Christus nominat, quæ in sequenti versu Patris seu ejus, a quo missus fuerat, opera appellat. Unde Slichtingius colligit, Christum non sua propria, sed Patris virtute miracula edidisse, quasi vero divina illa virtus, quæ in Patre est, non esset etiam Christo propria, qui se cum Patre unum esse prædicavit Joh. X, 30.

d) cod. 271. pag 820. *e)* pag. 248

§. LII.

Quemadmodum ergo Lazari morbus non ad mortem erat, sed ad gloriam Dei, & ut Filius Dei ejus resurrectione glorificaretur Joh. XI, 4. ita etiam cæcitas hujus hominis manifestandis Dei operibus occasionem præbuit. Nam, ut pulchre Isidorus Pelusiota in epistola ad Isidorum Diaconum aliquoties memorata loquitur, συνεχρήθη σκῆμα τῆ φύσεως, ἵνα ἀνακρηχθῇ ὁ τεχνίτης claudicare permissa est natura, ut artificis gloria celebretur. Huc ergo Christus animos Apostolorum intentos esse voluit, cum aliena peccata scrutarentur. Quemadmodum enim Christus Apostolos de tempore, quo regnum Israelitarum reparaturus esset, interrogantes, a quæstione captum eorum supergressa ad magis necessaria divertit, dum illis promissionem Spiritus S. paulo post super eos venturi in memoriam revocavit Act. I, 6. 7. 8. ita etiam hac vice Discipulos, cum in peccata cæci & parentum ejus temere inquirerent, a curiosa hac quæstione abstractos ad contemplationem divinorum operum præparavit. Qua Cyrilli observatione explicationi sacri nostri textus colophonem imponimus.

§. LIII.

§. LIII.

Varios ejus abusus in ipsa exegeſi jam notavimus, ad quos præter ineptas quorundam allegorias etiam referri poteſt, quod Hobbeſius in Leviath. cap. 31. pag. 168. ex reſponſo Chriſti colligit, mala quibus pii affliguntur, non peccato, ſed potentiæ divinæ, cui reſiſti non poſſit, tribui debere, quaſi vero Chriſtus cæcum hunc hominem ab omni plane peccato immunem fuiſſe pronunciaverit. Superest, ut meliorem ejus uſum paucis oſtendamus. Imprimis autem ex hoc Chriſti reſponſo ad quæſtionem Diſcipulorum de cauſa calamitatis in homine a nativitate cæco diſcimus, varias eſſe cauſas, ob quas hominibus calamitates divinitus immittuntur. Diſcipuli in ea opinione verſabantur, quod magnæ calamitates non niſi ob enormia peccata vel propria vel parentum hominibus infligerentur. Unde cæcum videntes interrogabant: hicne peccavit, an parentes ejus? Verum Chriſtus reſpondet, neque cæcum neque ejus parentes peccaſſe, ſed naturam defeciſſe, ut Dei opera in illo manifeſta fierent. Nequaquam ergo exiſtimare debemus, neminem magna aliqua afflictione premi, quin vel propria delicta luere, vel pœnas parentibus debitas pendere cogatur. Sunt enim & aliæ cauſæ, quarum gratia nonnulli homines, etſi nec ipſi nec ipſorum parentes gravius quam alii peccaverint, graviora tamen, quam alii, mala patiuntur.

§. LIV.

Multos homines cæcos Scriptura, hiſtoria eccleſiaſtica & profana, nec non quotidiana experientia nobis ſiſtit. Sed cauſæ hujus calamitatis, ſi communem & generalem excipiamus, non ſunt apud omnes eadem, etſi omnes idem malum experiantur. Elymas Magus, cum Paulo & Barnabæ evangeliſm prædicantibus reſiſteret, & Sergium Proconſulem a fide avertere niteretur, conſeſſim excæcatus eſt, & cadentibus in eum tenebris palps & circumerrans ductorem, qui ei manum daret, quærere coactus eſt, ut dignas ſcelere ſuo pœnas lueret, & ab eorum qui credituri erant, perturbatione ceſſaret Act. XIII. 11. Idem Paulus, qui hanc cæcitatem Elymæ divinitus indixit, ſub initium converſionis ſuæ id cum Elyma commune habuit, ut cæcitate percuſſus *καὶ ἐπεὶ οὐκ ἔβλεπεν* indigeret, qui Damascum ipſum ducerent, ubi per triduum cæcitate laboravit Actor. IX. v. 9. Hæc autem cæcitas Paulo evenit, ut, qui Chriſtianos captivos abducere gaviſus fuerat, jam ipſe quaſi captivus priſtini peccati memor tanto ardentius ad Deum converteretur. Tobia quoq; cum Elyma commune erat, quod in tenebris ſedebat, & ſolis lumen

vide-

videre non poterat, unde magna ipsi tristitia nascebatur. Sed cæcitas quæ Elymæ τιμωρία, Paulo παιδεία fuit, Tobiaḡ δοκιμασία erat, ut fides ejus & patientia aliæque virtutes hac afflictione in aliorum exemplum exercerentur Tob. II, II. 12. sequ. Nonnunquam etiam Deus excæcatione hominum usus est, ut suis auxilio esset, eosque contra hostium suorum & persecutorum injurias defenderet, quemadmodum milites Syros tali ἀσφαλεία plexos legimus, ut Elisam prope astantem & colloquentem non agnoscerent 2. Reg. VI, 18. 19. Maris Chalcedonis Episcopus, cum senex suffusione oculorum laboraret, & manu pueri deductus Julianum Imperatorem adiisset, Juliano cæcitatem false exprobranti respondebat: ἀλλ' ἐγὼ χάριν ἔχω τῷ θεῷ ὡς τῆς τυφλώσεως, ἵνα μὴ σε θεάσωμαι τῆς εὐσεβείας ἐκπεπληγότα, *gratias ago Deo meo, quod luminibus orbatus sum, ne te videam qui a pietate excidisti* f). Cujus aliorumque exemplo patet, nonnullos hoc cæcitatis beneficio frui, ut a malis sive videndis sive faciendis præserventur. Multa eorum, qui ab hominibus excæcati sunt, exempla colligit doctissimus Ictus Petrus Faber in suis semestribus g), sed non est una omnium ratio, qui ibi memorantur. Zedekias enim excæcatus justas perfidiæ suæ poenas tulit, ut alios, qui ob stupra aliaque crimina excæcati referuntur, taceamus. At christianis, quos ob fidem a Tyrannis vel excæcatos, vel aliis membris mutilatos memorat, eadem calamitas paterna castigatio & virtutis probatio extitit. Legitur inter epistolas Hieronymi ea quæ ad Castrutium cæcum scripta est h). In ea Castrutium obsecrat, ne cæcitatem suam de peccato sibi obvenisse existimet, cum multi sancti oculorum caligine laboraverint, contra vero multorum impiorum tabernaculis hoc flagellum non appropinquaverit. Qua occasione etiam responsum Christi ad discipulos adducit, *obsecro, inquit, ne imbecillitatem corporis quam sustines de peccato tibi existimes evenisse, quod quidem & Apostoli suspicantes de eo, qui natus erat cæcus ex utero, interrogantesque Dominum Salvatorem: iste peccavit, an parentes ejus, ut cæcus nasceretur? audiunt: neq; hic peccavit, neque parentes ejus, sed ut manifestentur opera Dei in illo.*

f) Sozom. l. 5. hist. eccl. c. 4. g) l. 3. c. 19. h) epist. 33.

LV.

Est ergo inter causas cæcitatis imprimis etiam referenda operum Dei manifestatio. Quæ certe in omnibus illis cæcis facta est, quibus Chri-

F

stus

stus divina virtute visum reddidit, & se verum Messiam demonstravit, quem cæcorum oculos aperturum Propheta prædixerat Jes. XXXV, 5. Quin etiam in iis, qui cæci manent, haud raro opera divinæ bonitatis manifesta fiunt, cum ille corporis defectus aliis corporis animique dotibus largissime compensatur. Quanta rerum divinarum & humanarum scientia excelluerit Didymus etsi cæcus, ex Hieronymi aliorumque scriptis elucescit, & ex ipsius Didymi scriptis clarius constaret, nisi ex pluribus pauca ad nostram ætatem pervenissent. Michaelis Pickelii exemplum vel ideo silentio prætermittere nolumus, quod ab utero cæcus eo usque in S. Scripturæ cognitione perfecit, ut A. C. 1602. Augustæ Vindelicorum in æde Wolfgangi historiam hominis a nativitate cæci a Johanne descriptam egregia concione explicaverit, quæ de re Jacobus Thomafius i) videatur, qui hujus Pickelii occasione plura alia exempla ejusmodi cæcorum adducit, in quibus admiranda Dei bonitas & sapientia ad miraculum usque se exeruit.

i) Historisch. Spruchb. pag. 271.

LVI.

Quod de cæcitate dictum est, etiam de aliis malis variisque, quæ hominibus accidunt, calamitatibus dicendum est. Varias enim ob causas eas hominibus immitti constat, de quibus Melanchthon k), Brentius l) & alii prolixè differunt. Quorsum etiam spectat Chrysostomi homilia prima ad Antiochenos, in qua occasione Timothei semper ægrotantis disquirat, cur Deus nonnunquam homines pios & ecclesiæ utiles morbis aliisque ærumnis affligat, & fieri hoc observat, ne donis suis extollantur, ne ceteri majorem de iis opinionem habeant, quam humana natura permittit, ut Dei virtus per ægrotantes magis appareat, ut eorum patientia manifesta fiat, ut alii in gravibus malis, si ad eos respiciant, consolatione afficiantur, ut alias rationes ab eo adductas, & ex Scriptura confirmatas taceamus. Atque huc etiam pertinent, quæ Apologia Augustanæ confessionis in articulo de confessione & satisfactione m) docet, ubi inter alia legitur: *ut afflictiones plerumque sint pœna peccatorum, tamen in piis habent alium finem potiorē, scilicet ut exerceant eos, ut inter tentationes discant querere auxilium Dei, agnoscere diffidentiam cordium suorum &c.* & paulo post: *afflictiones non semper sunt pœna aut signa iræ, imo pavidæ conscientie docendæ sunt, alios fines afflictionum potiores esse,*

se, ne sentiant se a Deo rejici, si afflictionibus nihil nisi pœnam & iram Dei videant. Alii fines potiores sunt considerandi &c. Cujus rei gratia etiam Christi responsum ad Discipulos allegatur his verbis: & cum Discipuli interrogarent de cæco, quis pescasset, respondet Christus, causam cæcitatis esse non peccatum, sed ut opera DEI in eo manifestentur.

k) Töm. III. Oper. pag. 733.

l) homil. 74. in Johann.

m) p. 193. & 195.

LVII.

Quæ cum ita sint, magna est ingenii humani perversitas, quæ, quoscunque Dei flagellum corripit, tanquam magnos peccatores condemnat. Quæ labes etiam ipsis Apostolis adhæsit. Etsi enim eos nihil attineret, aliena peccata nosse, statim tamen viso cæco quærebant: quis peccavit? hic an parentes ejus? Equidem Johannes Ferus in suis ad Johannis evangelium enarrationibus n) existimat, nequaquam Discipulos præcipitasse sententiam, nec temere judicasse, quod mundus solet, sed Dominum interrogasse, quod pii faciunt, & primum quidem interrogationis membrum fuisse, an afflictiones semper sint peccatorum supplicia? Verum hæc Apostolorum interrogatio non fuit. Persuasi enim, omnes insignes calamitates esse peccatorum supplicia, incerti tantum hærebant, num peccata ipsius cæci an parentum ejus hanc calamitatem ipsi adduxissent. Est autem hoc vitium hominibus admodum vulgare, ut sibi indulgentes in aliena crimina inquirent. Nullum Pauli flagitium Melitenses noverant, quem tamen ex vinculis, naufragio, & insiliente in ejus manum vipera Dei justissimi Vindicis pœnas effugere non posse suspicabantur. Cujusmodi iniqua judicia etiam Jobum & alios expertos novimus.

n) pag. 224.

§. LVIII.

Cum autem sæpe calamitates hominibus eveniant, ut Dei opera in illis manifesta fiant, caveamus nobis ab ea judicandi temeritate nec muscarum instar, quæ morbidis & exulceratis corporis partibus insidere solent, aliena vulnera mordaci lingua arrodamus. Ne simus curiosi in alienis peccatis cognoscendis, & desidiosus in nostris corrigendis. Potius si alios gravi calamitate afflictos videamus, in nosmet ipsos, quippe eadem vel graviora flagella meritos, qua par est animi humilitate descendamus, &
vera

vera poenitentia ad Deum convertamur. Sin ipsi in calamitates incidamus, non desperemus. Jesus præteriens vidit cæcum. Is prætereunte nos mundo & miseriam nostram negligente oculis misericordiæ suæ in nos respiciet, nec sine auxilii sui gratia præteribit.

LIX.

Denique homo a nativitate cæcus spiritualis cæcitatis nos commonefacit, qua ab utero laboramus. Si causam hujus cæcitatis inquiramus, fatendum est, primos nostros parentes, & nos omnes in illis peccavisse. Sed Jesus videns nostram cæcitatem & misertus nostri, populo in tenebris & umbra mortis sedenti salutem attulit, tantaque gratia miseros collustravit, ut opera Dei in nobis manifestata nunquam satis deprædicare possimus. Dici non potest, in quanta miseria versentur, qui hanc Christi gratiam & salutis mediâ negligunt, Phariseorum exemplum imitantes, qui connatam cæcitatem adscititia aggravantes eo usque vesaniæ procedebant, ut cæcitatem suam agnoscere nolentes justissimo Dei judicio indies cæciores redderentur. Unde & Christus eos in templo relictos præteriens ad cæcum properavit. Venerat enim in mundum ad judicium ut videntes cæci & cæci videntes fierent v. 39. Caveamus ergo a spirituali hac cæcitate, ne, Christo gratiam a nobis neglectam subtrahente, subinde magis excæcati in æternas tandem tenebras ejiciamur. Tu autem, benignissime Jesu, aperi mentium nostrarum oculos, & inhærentes nobis tenebras indies magis magisque dissipa, donec Te in altera vita a facie ad faciem videamus, & opera Dei in nobis manifestata æternum celebremus.

Thesi VI. pro *septiduum* lege *sextiduum*.

